

M241: Priester Wernher: Driu liet von der maget

0,261 ûz dem selben künne .
0,262 was ein kint ersprungen .
0,263 ein man in dise werlt geboren .
0,264 got selbe hête im erkoren .
0,265 sîn gedanke . unde sînen sin .
0,266 geheizen was er Joachim .
0,267 unde was der bezzisten ein .
0,268 den diu sunne ie überschein .
0,269 sîn einvalte was sô grôz .
0,270 daz er sîn von rehte genôz .
0,271 vore gote und vore den liuten .
0,272 Joachim quiut ze diute .
0,273 praeparatio domini .
0,274 sô wæne ich dâ geschriben sî .
0,275 daz quiut unsers hêrren garewunge .
0,276 ein lichtvaz dem sune .
0,277 scholte ouch werden bereit .
0,278 ûz sîner heilicheit .
0,279 wande er der megede vater wart .
0,280 diu den engelen was sô zart .
0,281 daz sie bî den bluomen .
0,282 wolte belîben unde ruowen .
0,283 unze sie muoter würde .
0,284 der gotelîchen bürde .
0,285 und ouch mit êren mehte sîn .
0,286 des himelrîches tûrlîn .
0,287 daz den übeln muoz gespart wesen .
0,288 den offen . die dâ schulen genesen .
0,289 an der sêle von reinem muote .
0,290 die vindent si genædic unde guot .
0,291 Joachim der gotes man .
0,292 êren genuoc er gewan .
0,293 in sîner kintheit .
0,294 leit er doch arbeit .
0,295 die wîle er in jugent was .
0,296 gerne er sanc und las .
0,297 von sînem schepfære .
0,298 diu starken alten mære .

0,299 er üebete sich harte in der ê .
0,300 mit vasten tet er im wê .
0,301 sîn mennischlîchen broede .
0,302 die twanc er alsô schône .
0,303 in einer guoten wîse .
0,304 er teilete ouch sîn spîse .
0,305 und alle sîn rîchheit endriu .
0,306 ze himele blickete er underdiu .
0,307 ein teil gap er den armen .
0,308 die liez er sich erbarmen .
0,309 beidiu witewen unde weisen .
0,310 daz ander ze goteshûsen .
0,311 den ze râte unde ze minne .
0,312 die gote dienten dâr inne .
0,313 ze dem almuosen was ime ger .
0,314 daz dritteil behielt er .
0,315 ze sîn selbes tische .
0,316 und sînem hîwische .
0,317 daz si dâr von spîse habeten .
0,318 die wîle daz si lebeten .
0,319 die spende treip er alliu jâre .
0,320 swaz er geredete daz was wâre .
0,321 er ne wolte niht liegen .
0,322 neheinen sînen genôz betriegen .
0,323 sîn sêle luterete er dâ mite .
0,324 von sô heiliclîchem site .
0,325 gap im got sînen segen .
0,326 himeltou und regen .
0,327 daz ez michel genuht gewan .
0,328 swaz er bûwen began .
0,329 an swiu sich der hêrre verlie .
0,330 mit heile ez vûre sich gie .
0,331 unde er gap im sæliclîche .
0,332 er was alsô viherîche .
0,333 daz er kûme vant die weide .
0,334 an dem velde unde an der heide .
0,335 dem korter alsô grôzen .
0,336 zuo ime en mahte sich nieman genôzen .
0,337 als er zweinzic jâr alt wart .
0,338 und im kûme erspranc der bart .
0,339 er ne wolte sich niht verbôsen .
0,340 mit decheiner gotlôsen .
0,341 er nam ein kint ze sîner ê .
0,342 jâ ne wæne ich sît noch êr .
0,343 kiuscher brût ie wart geboren .
0,344 die gemahelen hête er im erkoren .
0,345 ûz Dâvîdes geslehte .
0,346 daz er dâ mit mehte .

0,347 behalten sêle unde lîp .
0,348 alsô schoene was daz wîp .
0,349 daz ir alle die si an sâhen .
0,350 der êren und der sælden jâhen .
0,351 unde sie ouch minnende wâren .
0,352 von ire tugentlîchen gebæren .
0,353 ire liebe kêrten sie zuo ir .
0,354 âne wentlîche gire .
0,355 si hête reinez leben .
0,356 unde begunde grôz almuosen geben .
0,357 und ire opfer vile gereite
0,358 in ire jugent joch der kintheite .
0,359 mit vile vrôuwederîchen muote .
0,360 als der got meinete gerne tuot .
0,361 si kunde . niht gerasten .
0,362 von wachenne unde von vastenne .
0,363 wan des pflegete sie âne mâze
0,364 ire guoten umbesæzen .
0,365 die lobeten den got .
0,366 der himel und erde gebôt .
0,367 und die mergriezen zelt
0,368 daz er im die hête erwelet .
0,369 ze sîne selbes êren
0,370 und bâten an ir gemêren .
0,371 sîn lop zuo bezzerunge
0,372 den alten unde den jungen .
0,373 daz sie biledes dâ bequæmen .
0,374 unde die süezen lêre næmen
0,375 von vile maniger guottæte .
0,376 die sie gevrumet hæte .
0,377 wole vrôuwete sich dô Joachim .
0,378 und sîn liebiu vrouwe mit im .
0,379 wan sie lebeten wünniclîche ensamente .
0,380 Anna was sie ze rehte genante .
0,381 Anna daz quiut gratia .
0,382 michel genâde diu was dâ
0,383 wande von in der wuocher bequam .
0,384 der vrouwen Even schulde benam .
0,385 und sie die maget scholeten gebern .
0,386 die got selbe niene mac entwern .
0,387 decheiner bete die sie an in getuot .
0,388 nû dingen ire genâden daz ist uns guot .
0,389 der vrouwen Annam gebar .
0,390 der vürste hiez Isachar .
0,391 sie was sîn liebiu tochter .
0,392 wole von herzen loben mohte er .
0,393 die gotes ordenunge
0,394 daz er ein solich kint hête gewonnen .

0,395 iedoch wâren ez klagelîchiu dinc .
0,396 daz diu vrouwe und der jungelinc .
0,397 zweinzic jâr ensament wâren .
0,398 daz si kindes niht gebâren .
0,399 daz tet in inniclichen wê .
0,400 wan sie hête vervluochet diu ê .
0,401 di ungesegenet alsô ersturben .
0,402 daz si erben niht erwurben .
0,403 eines tages dô sie kâmen .
0,404 und daz gotes wort vernâmen .
0,405 in dem templo domini .
0,406 Joachim der stuont dâ bî .
0,407 dâ sich die êwarten .
0,408 zuo dem opfer garwten .
0,409 unde nâch ire gewoneheite .
0,410 hêten die schâf dâr vûre gereitet .
0,411 lemben und diu rôten rinder .
0,412 Joachim der stuont dâr under .
0,413 sam diu einvalte tûbe .
0,414 daz er dâ sîn versûme .
0,415 ervollte und ouch sîniu leit .
0,416 gote in dem herzen kleite .
0,417 er hête opfers genuoc .
0,418 daz im sîn hîwische dar truoc .
0,419 daz wolte er dâ verbrennen .
0,420 den rouch ze himele senden .
0,421 vûre diu gotes ougen .
0,422 grôzen habete er gelouben .
0,423 dô was ie nît als ouch nû .
0,424 ein scriba der trat dâr zuo .
0,425 Ruben der êwarte .
0,426 den hêren rafste er harte .
0,427 und bestuont in alsô sêre .
0,428 er sprach “dû en scholt niene mêre .
0,429 zuo unserem opfer gân .
0,430 wir haben uns alle wole entstân .
0,431 got hât dich sô vervluochet .
0,432 daz er niene geruochet .
0,433 decheines wuochers von dir .
0,434 dîn ! vrevele missevellet mir .
0,435 dû muost dich sundern hinnen .
0,436 wir ne wellen niht gewinnen .
0,437 susgetânen gesellen .
0,438 wir megen ouch dich ze den bezzisten niht gezelen .”
0,439 von solichen itewîzen .
0,440 mit sînen handen wîzen .
0,441 swanc er alsô tougen .
0,442 die zaher von den ougen .

0,443 ez dûhte in michel schande .
0,444 und iedoch was im niht sô ante .
0,445 daz er daz selbe schelten .
0,446 mit übele wolte gelten .
0,447 er ne wolte ouch niht mêre .
0,448 wider in sîn hûs kêren .
0,449 unde wolte sich vore leide .
0,450 von sînen wîbe scheiden .
0,451 von sîner wünniclichen konen .
0,452 in einer wüeste gedâhte er wonen .
0,453 hin danne von den liuten verre .
0,454 dar hiez ouch im der hêre .
0,455 allez sîn quarter trîben .
0,456 als er dâ gerte belîben .
0,457 des vihewuochers wolte er dâ leben .
0,458 zehenden unde almuosen geben .
0,459 michels baz denne êr .
0,460 vile veste wesen an sîner ê .
0,461 gote sînen kumber dâ künden .
0,462 unde sîn angest ze allen stunten .
0,463 klagen ouch mennischliche broede .
0,464 in der wilden einoete .
0,465 daz diu werlt anders niht en ist .
0,466 wan stüppe unde mist .
0,467 und ein schate der gar verswindet .
0,468 sô sich diu sêle entbindet .
0,469 von mennischlicher zarge .
0,470 sô zergât ouch alliu vröuwede mit arge .
0,471 unde alliu werltliebe dâ gelît .
0,472 sô daz leben den lîp begît .
0,473 als vrouwe Anna daz ervant .
0,474 daz Joachim der ire man genant .
0,475 sô sêre was geleidiget .
0,476 dô wære ir lieber der tôt .
0,477 daz vile wünnicliche wîp .
0,478 harte quelte sie den lîp .
0,479 daz er ir hête entwichen .
0,480 des was ire klage michel .
0,481 und sô verre hin was gevarn .
0,482 sie en trûwete niht bewarn .
0,483 ire hîwische dâ heime .
0,484 dâr umbe saz si mit leide .
0,485 unde weinete herzicliche .
0,486 daz sie got sô kumberrîche .
0,487 hête geschaffen unde gesazt .
0,488 an der unsæligen stat .
0,489 daz sie bî sô reinem manne .
0,490 nie herzeliep mit kinde gewan .

0,491 und dâ zuo bî im lebentigen .
0,492 daz si witewe solte geligen .
0,493 daz wâren sorgen ungevüege .
0,494 die nehein lîp sanfte trüege .
0,495 dô muose erbleichen danne .
0,496 diu schoene unde diu guote vrouwe Anne .
0,497 ire liehtiu varwe verdarp .
0,498 al ire vrôuwede erstarp .
0,499 ire hende huop sie hin ze im genôte .
0,500 der uns daz leben gebôt .
0,501 si sprach vile klagelîche .
0,502 “ô wê got der genâdige unde der rîche .
0,503 dû ruoche mich arme bedenken .
0,504 jâ ne mac ich niht gewenken .
0,505 ich en müeze lîden swaz dû wile .
0,506 jâ hân ich angeste vile .
0,507 wâ mehte ich reste vinden .
0,508 dô dû mir an den kinden .
0,509 verzige liebes beschöuwede
0,510 daz dû mir dô die einen vrôuwede .
0,511 die ich hête benomen hât .
0,512 dîn genâde hêre swaz dû begâst .
0,513 reht unde genâde sint beidiu dîn .
0,514 daz lâz an mir werden schîn .
0,515 swaz dû wile daz muoz ergên .
0,516 die tôten heizest dû ûf stên .
0,517 di armen makes dû rîche .
0,518 in selben ungelîche .
0,519 die rîchen hoehes dû ze valle .
0,520 des müezen sie dir alle .
0,521 von rehte der meisterschafte jehen .
0,522 swar dîn ouge ruochet hin gesehen .
0,523 dâ ist sâr der sælden mêr .
0,524 denne grieztes in dem sê .
0,525 mêre der güete unde der berme dîn .
0,526 denne zwîer ze walde mege sîn .
0,527 gezalt hât dû al die sterne .
0,528 si mügen dir dienen gerne .
0,529 die dû wile beruochen .
0,530 nû ledige mich von dem vluoche .
0,531 der mich hât erderret
0,532 unde mîne wambe besperret .
0,533 die scholt dû hêre entsliezen .
0,534 daz ich dîner milte genieze .”
0,535 Anna begunde venjen .
0,536 mit zaheren alsô manigen .
0,537 daz si got erhôrte .
0,538 unde ire angest zerstôrte .

0,539 dô sie nider genicte .
0,540 unde wider ûf geblicte .
0,541 in einem boumgarten .
0,542 sie began umbe warten .
0,543 unde sach an einem aste .
0,544 die sperken schrîen vaste .
0,545 si gâheten ze einem neste .
0,546 ûf eines boumes veste .
0,547 diu vrouwe nam des goume .
0,548 ûf einem lôrboume .
0,549 wie vroelîche si vlugen .
0,550 dâ sie ire jungede zugen .
0,551 unde brâhten in ire spîse .
0,552 dô sprach si alsô lîse .
0,553 “ô wê ô wê got hêrre .
0,554 beidiu nâhen unde verre .
0,555 ist dîn trôst geleitet .
0,556 dîn genâde ûz gebreitet .
0,557 vûre aller slahte kunder .
0,558 dû stiftest grôziu wunder .
0,559 durch daz dû in allen obe lîst .
0,560 dîner créatiure dû gîst .
0,561 misselîche genâde unde wünne .
0,562 von regene joch von sunne .
0,563 makes dû die erde berhaft .
0,564 den vogellînen gîs dû die kraft .
0,565 daz sie ire kint meinent .
0,566 swie sie in den luften sweiment .
0,567 dû gebiutest dem wilde .
0,568 daz ez nâch muoterlîchem bilede .
0,569 allez sîniu kint ziehen kan .
0,570 unde hât ouch sîn vröuwede dâr an .
0,571 von dir die vische nâmen .
0,572 beidiu wuocher unde sâmen .
0,573 die in dem wazzer vliezent .
0,574 dîner güete si geniezent .
0,575 allez daz dâr ie unde ie wart .
0,576 hât dînen segen wole bewart .
0,577 daz ez sich ie iteniuwet .
0,578 swaz kriset oder vliuget .
0,579 ûf der erde unde in dem wâge .
0,580 nû sage ich dir genâde .
0,581 daz ! dû mich alterseine .
0,582 sô verre hât gescheiden .
0,583 von allem dem dinge .
0,584 daz ûz dem urspringe .
0,585 dînes gewaltes ist bekommen .
0,586 dâr ûz hâs dû mich genomen .

0,587 gesundert joch gescheiden .
0,588 des muoz ich mîn sünde weinen .”
0,589 bedaz sie die rede volsprach .
0,590 einen engel si gesach
0,591 vore ire antlütze stên .
0,592 diu vorhte begunde sie durchgên .
0,593 sie widersaz ir ez harte .
0,594 dô sie in began an warten .
0,595 ire sin vuor enwadele .
0,596 sam vore dem winde diu vedere .
0,597 unde ouch daz loup gerne tuot .
0,598 der engel swanc ir den muot .
0,599 ûz den sorgen alsô swæren .
0,600 mit senftlîchen gebæren .
0,601 er gruozte die vrouwen schône .
0,602 mit der boteschaft vrône
0,603 mit minnelîchen Worten .
0,604 “dû solt mich niht ervürhten .
0,605 in des gewalte diu werlt stât .
0,606 und alliu dinc geschaffen hât .
0,607 im ze dieneste und ze lobe .
0,608 wande er rîchsenent dâr obe .
0,609 der wile in dînen sachen .
0,610 genædiclîche wachen .
0,611 über dîn reinez gebet .
0,612 als er küninc ie tet .
0,613 über alle die ire gemüete .
0,614 kêrent an sîne güete .
0,615 dô dîn karle Joachim .
0,616 als ich dir kündente bin .
0,617 von dir nû ze jungeste schiet .
0,618 diu gotes genâde iuch beriet .
0,619 daz dû swanger würde .
0,620 einer küninclîcher bürde .
0,621 dû treist bî dînen brusten .
0,622 des dich wole mac gelüsten .
0,623 eine tochter hêre .
0,624 jâ ne wirdet ouch niemer mêre .
0,625 dechein ir gelîch geboren .
0,626 wan sie ist ze vrouwen erkoren .
0,627 über allez himelische her .
0,628 von ir sol komen der .
0,629 der aller werlte vater ist .
0,630 daz ist der heilige Krist .
0,631 dîn tochter ist der engel vrôuwede .
0,632 wan sie in gotes beschôuwede
0,633 gewîhet ist unde gesegenet .
0,634 daz von ir genâde begegnet .

0,635 allem mennischlichem künne
0,636 si wirdet der werlte wünne .”
0,637 dô diu boteschaft was ergangen .
0,638 den sie hête bevangen
0,639 lieplîche mit ire ougen
0,640 der huop sich wider ze den tougen .
0,641 dâ diu engelischiu kint .
0,642 in gotes ordenunge sint .
0,643 dô begunde vrouwe Anne .
0,644 got starke loben danne .
0,645 si sagete im genâde grôz .
0,646 daz sie alsô vile genôz .
0,647 der sînen gûete wider in .
0,648 sie erhuop ire herze unde sin .
0,649 im ze dankenne mit vlîze .
0,650 wan er sie von dem itewîze .
0,651 mit sôgetânem trôste .
0,652 genædiclîche erlôste .
0,653 sie wart vile herziclîchen vrô .
0,654 ire venje suochte sie aber dô .
0,655 dâr nâch gienc sie rasten .
0,656 jâ hête sie daz vasten .
0,657 ein teil geswendet .
0,658 doch hête sie ire arbeit wole gewendet .
0,659 in ire bette sie gelac .
0,660 ein naht und einen tac .
0,661 daz sie en az noch en tranc .
0,662 si hête reinen gedanc .
0,663 jâ was ir an der selben zît .
0,664 als einem manne der dâ gelît .
0,665 begriffen mit swærem troume .
0,666 slâfente under einem boume .
0,667 dem komen wære ze siune .
0,668 daz er entrünne kûme .
0,669 vore den sînen vîanden .
0,670 unde dâr nâch erkante .
0,671 swenne er von dem slâfe erwachete .
0,672 daz garlîche alle sîn nôt .
0,673 von im wære verschwunden .
0,674 alsô was sie an den stunten .
0,675 bequicket von ire leide .
0,676 beidiu wünne und weide .
0,677 und vile stætigen segen .
0,678 hête ir der engel gegeben .
0,679 dô ruofte sie einer megede .
0,680 diu was vile ungesagete .
0,681 sie muose ir haren ofte .
0,682 mêre denne ez getohte .

0,683 iedoch über lanc gie si dar .
0,684 dô sprach diu tohter Isachar .
0,685 Anna diu vile reine .
0,686 “sage mir waz daz meine .
0,687 wannen kumet dir der geist .
0,688 sô dû mân angeste wole weist .
0,689 daz dû sô stille dagest .
0,690 unde mir antwûrte versagest .
0,691 dû wærest mir billicher bî .
0,692 unde sæhest wie mân dinc stênte sî .
0,693 ob ich den lîp wolte laben
0,694 daz ich daz von dir mehte haben .”
0,695 diu maget begunde murmeln .
0,696 ungezônlichen zürnen .
0,697 si sprach “waz mac ich dir eine getuon .
0,698 dû ne hâst die tohter noch den sun .
0,699 dîn man der hât dich verlân .
0,700 nû wile ouch ich mân strâze gân .
0,701 anderhalben mân dinc wenden .
0,702 ich kan ez wole verenden .
0,703 waz tuos dû ze liebe mir .
0,704 swaz ich ie gedienete dir .
0,705 des en hân ich danc noch lône .”
0,706 die vrouwe vertruoc ez schône .
0,707 unde beweinete doch die itewîze .
0,708 unde swie ez wære an dem inbîze .
0,709 sie half dem lîbe alsô seine .
0,710 ire vröuwede wart gemischet mit leide .
0,711 der engel vuor hin umbe .
0,712 von gotes ordenunge .
0,713 dâ er wesse Joachim .
0,714 in der wüeste gienc er zuo im .
0,715 ûf dem breiten gevilde .
0,716 in eines knappen bilede .
0,717 unde gruozte in alsô lîse .
0,718 er sprach “hêrre vile wîse .
0,719 waz lîs dû hier sust eine .
0,720 wie hâs dû dich gescheiden .
0,721 von dîner lobelîchen konen .
0,722 wie ist diu unminne komen .
0,723 wes en vers dû niht widere .
0,724 diu vrouwe ist sô biderbe .
0,725 daz dû sie wole troesten muost .
0,726 unde ouch wenticlîchen tuost .
0,727 daz dû sie læzest sô lange vrist .
0,728 dû vindest dâ daz dir liep ist .
0,729 nû var heim zuo den dînen .
0,730 lâ dîn gewizzzen schînen .

0,731 var ûz disem steingevelle .
0,732 sich waz dîne kone welle .
0,733 hebe dich ûz diser klûse .
0,734 dû muost heim zuo dînem hûse .”
0,735 dô sprach der hêrre Joachim .
0,736 “wande ich ein süntære bin .
0,737 von schulden nôt ich lîde .
0,738 ich was bî mînem wîbe .
0,739 zweinzic jâr volle .
0,740 daz des got niene wolte .
0,741 daz ich dechein herzewunne .
0,742 noch liebe mit kinde gewünne .
0,743 waz scholte ich denne dâ suochoen .
0,744 jâ ne wellent des niht geruochen .
0,745 diu irdischiu liute .
0,746 daz ich mit mîner briute .
0,747 zuo ire opfer geturre gân .
0,748 dâr umbe muoz ich hier bestân .
0,749 unde sus armiclîchen leben .
0,750 unde wile doch almuosen geben .
0,751 iemer mînem schepfære .
0,752 der mich im ze kamerære .
0,753 gesetzet hât dâr übere .
0,754 wær ez mit mîner übele .
0,755 joch mit sünden niht undervangen .
0,756 ez wære mir lîhte baz ergangen .”
0,757 des antwurte im der engel .
0,758 “dîn leben ist âne wandel .
0,759 ich bin des himeles bote vrône
0,760 got hât dir gegeben ze lône .
0,761 ein tohter bî dînem wîbe .
0,762 diu kom von dînem lîbe .
0,763 dô dû jungeste schiede von ir .
0,764 vile mandunge sage ich dir .
0,765 dîn tohter diu wirdet sô lobesame .
0,766 daz aller mennischen name .
0,767 joch alliu himelischiu schare .
0,768 diu muoz knievallen dare .
0,769 dâ diu rôse âne dorn .
0,770 joch diu küniginne hêre wirdet geboren .
0,771 nû var in dîn gesæze .
0,772 wan swer dir hêrre mæze .
0,773 disen irdischen gibel .
0,774 hôhe ûf unze an den himel
0,775 mit rôtguldînen spelten .
0,776 der en mehte dir daz kint niht vergelten .”
0,777 als Joachim an dem worte .
0,778 den rîchen trôst erhôrte .

0,779 vüre den engel viel er bereite .
0,780 daz er gote unde im genâde seite .
0,781 er sprach "hêrre nû gewer mich .
0,782 einer bete der ich dinge an dich .
0,783 ob ich daz heil ze dir hân vunden .
0,784 sô nû vergiz der mînen sünden .
0,785 nû ich ze den êren sîe erwelt .
0,786 var sam mir in mîn gezelt .
0,787 und entbîzen wir dâr inne .
0,788 in der gotes minne .
0,789 daz mich dîn segen gesterke .
0,790 ze reiniclichem werke ."
0,791 der engel im antwurte .
0,792 "got selbe mit sînem worte
0,793 der geruoche dich gesegenen .
0,794 daz dir allez daz begegene .
0,795 daz dir lieb müge sîn .
0,796 dû ne bist niht der schalc mîn .
0,797 dû bist mîn hûsgenôze .
0,798 einen hêrren haben wir grôzen .
0,799 der dich alles des gewert .
0,800 des dîn diemüete an in gert .
0,801 er ne wile dîn niht vergezzen .
0,802 mîn trinken und mîn ezzen .
0,803 daz en maht dû niht beschouwen .
0,804 mit vleischlichen ougen .
0,805 daz ist daz êwige lieht .
0,806 dû ne darft mich an dingen nicht .
0,807 daz ich die dîne spîse .
0,808 zuo mînem munde wîse .
0,809 nû bringe der gotes krefte .
0,810 swaz dû ze wirtschefte .
0,811 mir hiute woltest bieten .
0,812 sô maht dû dich genâden nieten .
0,813 von dînes schepfæres gewalte .
0,814 der dîn güete hât gezalte .
0,815 und allez dîn almuosen .
0,816 treit in sînem buoseme .
0,817 daz dû ie begienge .
0,818 sît dû sîn gevienge .
0,819 daz dû im kundest gedienen .
0,820 er wile ouch dich erkennen unde lieben ."
0,821 der hêrre îlende gie .
0,822 ein lembelîn er gevie .
0,823 ein lamp ungemeiliget .
0,824 als im der engel gebôt
0,825 er sprach "ich en getorste ez niht getuon .
0,826 wan daz dû mir râtest dâr zuo .

0,827 unde mich sîn hâst geschundet
0,828 swaz ich nû hân gesundet
0,829 dâ hilf mir von durch dîn güete .
0,830 daz ich mit reinem gemüete .
0,831 vore dir daz opfer bringe .
0,832 jâ hân ich des gedinge .
0,833 daz ich geniezen müeze .
0,834 daz ich dînen vuozen .
0,835 alsô nâhen bî stên .
0,836 unze die oblei ergên .”
0,837 dô sprach der engel guot .
0,838 “en wesse ich niht in mînem muote .
0,839 daz dîn opfer liep wære .
0,840 des himeles rihtære .
0,841 sô ne hête ich ez niht gevrumet
0,842 sust weiz ich daz ez dir kumet .
0,843 ze dîner sælicheit wole .
0,844 wande unser rede dâ mit schol .
0,845 ûf der moltigen erde .
0,846 geurkündet werden .”
0,847 dô daz lamp was erslagen .
0,848 er îlete sâr holz zuo tragenne .
0,849 unde leite ez ûf einen stein .
0,850 er brante beidiu vleisch unde bein .
0,851 dô sich der rouch ûf bouc .
0,852 der engel al dâ mit vlouc .
0,853 der hêrre gestuont eine .
0,854 sîn herze was lûter unde reine .
0,855 sîn gebet was im unde uns nütze .
0,856 mit zehern ûf sîn antlütze .
0,857 viel er nider an daz gras .
0,858 dâ er dâ opferente was .
0,859 er lac bî dem gezîle .
0,860 von der sehsten wîle
0,861 unze an die vesperzît .
0,862 sô diu sunne schate gît .
0,863 dô komen sîn hirte .
0,864 hin ze ire hêrren unde ire wirte .
0,865 si begunden gâhen .
0,866 dô si in ersâhen .
0,867 ligen in der molten .
0,868 sie wântten daz er wolte .
0,869 sich selben verliesen .
0,870 vore leide den tôt kiesen .
0,871 sie îlten in ûf rihten .
0,872 er sagete ouch ze ire gesichte .
0,873 wie ez was ergangen .
0,874 dô wurden sie bevangen .

0,875 mit vröuweden joch mit vorhten .
0,876 anders sie niene worhten .
0,877 wan daz sie lobeten got .
0,878 der ûzer angest unde nôt .
0,879 diu riuwigen herze entbindet .
0,880 swâ er den gelouben vindet .
0,881 dô was ez ir aller geræte .
0,882 daz er zehande sô tæte .
0,883 nâch den engelischen worten .
0,884 sie sprâchen daz sie vorhten .
0,885 anders den gotes zorn .
0,886 ob er sîn gebot hête verkoren .
0,887 als er des nahtes entslief .
0,888 der engel im aber zuo rief .
0,889 “wes sûmest dû dich Joachim .
0,890 anderstunt ich bote ze dir bin .
0,891 daz dû heim müezest varn .
0,892 dû ne wellest ez bewarn .
0,893 dû entgiltest sîn ze wære .
0,894 daz Anna lebet sô swære .
0,895 unde sô dicke nâch dir weinende wirdet .
0,896 dû weist wole daz sie dir gebiret .
0,897 eine tohter guote .
0,898 diu ist in gotes huote .
0,899 von êwen unde ze êwen .
0,900 wer schol dich dîner êren pflegen .”
0,901 an dem andern morgene .
0,902 dô verliez er alle sorgen .
0,903 er huop sich ûf gereiten .
0,904 unde en wolte niht mêre beiten .
0,905 er sagete sînem liute
0,906 des engels rede ze diute .
0,907 die rieten algemeine .
0,908 daz sie vüeren seine .
0,909 alsô daz daz vihe mehte gên .
0,910 si sprâchen wolte er dâ bestên .
0,911 daz muose âne sie geschehen .
0,912 got begunden sie jehen .
0,913 sîner grôzen barmunge .
0,914 mit lobe sprechender zunge .
0,915 sie vuoren enalverte .
0,916 diu mos joch die herde .
0,917 beidiu berge unde tal .
0,918 daz vihe kêrten sie überal .
0,919 si wâren in der einoete .
0,920 ensament vûnv mânôde .
0,921 daz er boteschaft neheine .
0,922 noch boten sande hin heime .

0,923 sînem tugentrîchem wîbe .
0,924 daz hête sie ze nîde .
0,925 dô sie an ire gebete stuont .
0,926 als dicke die guoten tuont .
0,927 mit zeheren wole begozzen .
0,928 der engel unbedrozzen .
0,929 der kom ir aber ze suone .
0,930 bî des boumgarten zûne .
0,931 dâ lac sie an ire kniewe .
0,932 der engel zuo ir gie .
0,933 ire leit er ir gebuozte .
0,934 dô er sie mit liebe gruozte .
0,935 er sprach daz sie gienge .
0,936 unde ire karle wole entvienge .
0,937 ze einer porte hiez aurea .
0,938 der wirt beegenete ir dâ .
0,939 âne zwîvel an dem tage .
0,940 dô was ire trûren unde ire klage .
0,941 in den wint gâhes verschwunden .
0,942 sie was gevrîget unde entbunden .
0,943 si gâhete engegen dem bûrge tore .
0,944 ire wirtes beitete sie dâ vore .
0,945 mit des engeles geleite .
0,946 si hête wole gewant ire arbeit .
0,947 ûf eine hoehe sie gestuont .
0,948 alsô die getriuwen gerne tuont .
0,949 die liebe vriunde ûf dem wege hânt .
0,950 und dicke an die warte gânt .
0,951 ire hîwische stalte sie ze den sîten .
0,952 daz mære vlouc dô wîten .
0,953 daz der hêrre komen solte .
0,954 unde in dâ entvâhen wolte .
0,955 diu vrouwe von des – engeles lêre .
0,956 des gewunderte sêre .
0,957 daz liut joch die lantschaft .
0,958 sie lobeten die gotes kraft .
0,959 unde alliu sîniu wunder .
0,960 diu êrten sie dâr under .
0,961 vrouwe Anna diu wart ouch erwelt .
0,962 und enticliche gezelt .
0,963 ze dem allerbezzisten wîbe .
0,964 diu iener wære enlîbe .
0,965 schiere sie dô sâhen .
0,966 zuo in über velt gâhen .
0,967 Joachim mit sîner schare .
0,968 diu vrouwe huop sich dare .
0,969 umbe den hals sie in gevie .
0,970 an sîner hande sie gie .

0,971 sie kuste in diu reine unde diu guot .
0,972 mit vile vroelîchem muote .
0,973 unde entvienc in inniclichen wole .
0,974 als liep herzelieben schol .
0,975 âne sündemeilige minne .
0,976 wan ze gote stuonten ire sinne .
0,977 der die guoten beruochet ie .
0,978 diu menige im engegen gie .
0,979 unde hiez in willekomen sîn .
0,980 dô wart al der werlte schîn .
0,981 daz sîn ie vile guot rât wirdet .
0,982 der daz übel durch die wârheit verbiret .
0,983 Ruben den êwarte .
0,984 den mahte dô riuwen harte .
0,985 swaz er dem hêrren ie sprach .
0,986 dô er die zeichen gesach .
0,987 diu ze mære wâren komen .
0,988 unde wîten wurden vernomen .
0,989 in der jûdischen diet .
0,990 wie in got mit kinde beriet .
0,991 wie er in geruochte scheiden .
0,992 von kumber . unde in beiden .
0,993 nâch müejen vrôuwede verlêch .
0,994 der in diu werlt verzêch .
0,995 nâch den vierzic wochen .
0,996 diu kamer wart entlochen .
0,997 dâ diu rîchheit inne was .
0,998 dâ von der verloren mennische genas .
0,999 unde alliu gotes hantgetât .
0,1000 leben unde genâde entvengen hât .
0,1001 der wâz vile guoter salben .
0,1002 begunde dô allenthalben .
0,1003 ! ! ûz breiten sîne sûeze .
0,1004 den süntæren ze buoze .
0,1005 ze einer gewissen urstende .
0,1006 nâch des lîbes ende .
0,1007 der vater vile guoter .
0,1008 und ire vile edeliu muoter .
0,1009 die ne wolten die himelrôsen .
0,1010 mit namen niht verbôsen .
0,1011 si hiezen sie Marîen .
0,1012 wande als daz honic die bîgen .
0,1013 ûz dem trôre mügen vinden .
0,1014 alsô kan sie den kinden .
0,1015 die ir dienen und getrûwent .
0,1016 die wîle sie hier in erde bûwent .
0,1017 den heiltriefenden vladen .
0,1018 nâch disem lîbe vûre tragen .

0,1019 sie kan ouch die bitter der sünden .
0,1020 joch die tōtlīche wunden .
0,1021 mit ire güete wole verdecken .
0,1022 nû ruoche sie uns erwecken .
0,1023 daz wir sie von herzen meinen .
0,1024 sô mac sie uns genâde bescheinen .
0,1025 dô daz reine magedîn wart geboren .
0,1026 dô wart erleschet der zorn .
0,1027 der gotes unwirde .
0,1028 unde vleischlīcher girede .
0,1029 dô wart ouch der mennische .
0,1030 geladet ze gotes tische .
0,1031 ze dem lebentigen brôte
0,1032 daz die sêle nimet ûz der noete .
0,1033 der mennische wart engels genôz .
0,1034 honic unde milch ûz der erde vlôz .
0,1035 got die werlt dô segenete .
0,1036 und heil von himel regenete .
0,1037 pigmende ôle unde mirre .
0,1038 daz schâf daz êr vuor irre .
0,1039 daz vant dô krippe unde stal .
0,1040 dô got lûhte überal .
0,1041 uns kom der wîntrûbe .
0,1042 diu wâre turteltûbe .
0,1043 wart gehôret vile gereite .
0,1044 über al die kristenheit .
0,1045 der tac daz sie geboren wart .
0,1046 der ist lieb wert unde zart .
0,1047 allem dem liute .
0,1048 daz sich mit der brûte
0,1049 gert ûz den sünden swingen .
0,1050 under ire vanen dingen
0,1051 die jungen unde die alten .
0,1052 müezen die dult behalten .
0,1053 mit vîre . gesange . unde gebete .
0,1054 wande uns got genâde mit ir tet .
0,1055 unde über uns selbe erschein .
0,1056 daz wâre lieht brâhte sie eine .
0,1057 sie ist unser vrôuweden aneganc .
0,1058 ire güete wert wole die lenge .
0,1059 swâ man sent Marîen nennet .
0,1060 sô vrôuwet sich unde mendet .
0,1061 beidiu ensament sêl unde lîp .
0,1062 wande uns ire name die wîsunge gît .
0,1063 ze unser heimuote .
0,1064 ûz irdischer broede .
0,1065 bezzet name wart nie .
0,1066 daz sie daz leben ie geve .

0,1067 des loben wir den heilant .
0,1068 der dâ herberge vant .
0,1069 in dem sunnenschîne .
0,1070 daz ist diu muoter sîne .
0,1071 dannen über driu jâre .
0,1072 daz sie die tohter gebære .
0,1073 ire opfer sie ûf huoben .
0,1074 mit dem kinde sie daz truogen .
0,1075 gegen dem sale vrône .
0,1076 Maria gie sô schône .
0,1077 sô wole ûfgerihtete .
0,1078 den liuten ze gesihte .
0,1079 daz sie nie umbe gesach .
0,1080 ze der muoter sie niht en sprach .
0,1081 noch sich dâr zuo gemuozete .
0,1082 daz sie den vater gruozte .
0,1083 unde sie nie des gezam .
0,1084 daz sie wîp oder man .
0,1085 ane wolte schouwen .
0,1086 sie gie vore al den vrouwen .
0,1087 vile gereite zuo der reste .
0,1088 aller diernkinde bezziste .
0,1089 daz suochte manige venje .
0,1090 des wunderete die menige .
0,1091 daz sie kint was an deme lîbe .
0,1092 unde doch als ich vûre wâr schrîbe .
0,1093 der werlte ein bilede vore truoc .
0,1094 daz was zûhticlich genuoc .
0,1095 unde guot ze merkenne überal .
0,1096 den megeden in dem sale .
0,1097 die gote ze aller zît dienten dâ .
0,1098 nû wart ouch entvolhen sâr .
0,1099 den selben vrouwen daz kint .
0,1100 dem die sæligen dieneute sint .
0,1101 alsus beleip sie under in .
0,1102 diu muoter unde Joachim .
0,1103 begunden dannen kêren .
0,1104 diu maget wuohs mit êren .
0,1105 âne aller slahte itewîz .
0,1106 wan got selbe sînen vlîz .
0,1107 unde sîn huote an sie leite .
0,1108 des wart im genâde geseite .
0,1109 von allen die in meinten .
0,1110 vore liebe sie beweinten .
0,1111 des kindes tugent . zuht . unde güete .
0,1112 süeze gebære . reinez gemüete .
0,1113 dô sprach vrouwe Anna .
0,1114 “got schiubet ûf lange .

0,1115 sîne genâde swenne er wile
0,1116 unde gît ir ensament vile .
0,1117 daz sie nieman mac ergründen .
0,1118 noch vürebaz gekünden .
0,1119 gezelen noch gemezzen .
0,1120 wer scholte im des vergezzen .
0,1121 die mîne vîande .
0,1122 die stênt nû mit schanden .
0,1123 die mir übele sprâchen .
0,1124 si ne wessen waz sie râchen .
0,1125 dô ich unberhaft was .
0,1126 unde dâr nâch schiere genas .
0,1127 der herzelieben tohter mîn .
0,1128 dô wart wole in allen schîn .
0,1129 daz daz gotes zeichen .
0,1130 her ze mir wolte gereichen .
0,1131 nû müeze in allez daz loben .
0,1132 daz von im ist bekommen .
0,1133 der mennische und daz wilt .
0,1134 der vogel . unde swaz in wâge spilet .
0,1135 swaz vliuzet oder swebet .
0,1136 swaz kreset oder lebet .
0,1137 ûf dem erdebodeme .
0,1138 unde in den luften obene –[...]”
0,2243 templi pontifices .
0,2244 die berieten sich des .
0,2245 wâr umbe die sehse magedîn .
0,2246 alsô müezic scholten sîn .
0,2247 sie sanden den edeln wîben .
0,2248 purpuram unde sîden .
0,2249 coccum unde bisse .
0,2250 sie entbuten in gewisse .
0,2251 beidiu sælde unde heile .
0,2252 unde daz sie in hulfen ein teil .
0,2253 an ire kirchgerüste .
0,2254 sô sie werkes geluste .
0,2255 sie bâten durch die alten minne .
0,2256 daz sie ire künftigen sinne .
0,2257 zeigten an dem garwe .
0,2258 unde die manigen varwe .
0,2259 sprangten an diu bilede .
0,2260 daz die lewen wilde .
0,2261 und die trachen swebeten dâr an .
0,2262 beidiu vogel unde man .
0,2263 diu misselîchiu merwunder .
0,2264 unde allez daz . kunder .
0,2265 des diu werlt pflæge .
0,2266 daz daz dâr an læge .

0,2267 die pfaffen sanden ouch dar .
0,2268 wole gezintelohten hare .
0,2269 daz sie in ze helfe spunnen .
0,2270 sô sie beste kunden .
0,2271 dô wart ein strît vile grôz .
0,2272 die vrouwen wurfen ire lôz .
0,2273 wâ der purper und die sîden .
0,2274 von rehte scholten belîben .
0,2275 weliche under in gezæme .
0,2276 daz sie daz bezziste næme .
0,2277 den rûhen hare sie vorhten .
0,2278 daz sie dâr an iht worhten .
0,2279 des wolte iegelich magedîn .
0,2280 vile gerne überic worden sîn .
0,2281 dô geviel daz lôz an daz kint .
0,2282 dannen diu guoten wîp sint .
0,2283 gesæliget unde gesegenet .
0,2284 daz die sîden grüne unde rôt .
0,2285 in ire handen beliben .
0,2286 alsô wolte sie gesigen .
0,2287 daz die andern næmen den hare .
0,2288 diu vile wênigiu schare .
0,2289 diu en lie daz niht âne nît .
0,2290 daz wart ouch in verwizzen sît .
0,2291 daz sie durch unminne .
0,2292 hiezen sie ire küniginne .
0,2293 diu von rechten schulden .
0,2294 was in gotes hulden .
0,2295 unde diu der êren krône treit .
0,2296 iemer muoter unde meit .
0,2297 der engel der daz himelbrôt .
0,2298 tagelîchen ir ze tische bôt .
0,2299 dô er an den schimpf gedâhte .
0,2300 den die megede hêten under in .
0,2301 den schimpf er ze erneste brâhte .
0,2302 er began schrecken ire sin .
0,2303 in allen gâhen er erschein .
0,2304 lieht als der tac gemeine .
0,2305 er sprach “ez ist ein wîssagen .
0,2306 daz . ir ze spotte wellet haben .
0,2307 ir werdet des inne .
0,2308 daz Maria keiserinne .
0,2309 über al dise werlt wesen muoz .
0,2310 sô wirdet iu des tûsches buoz .
0,2311 sô ir gesehet vile gereite .
0,2312 die unverborgen wârheit .”
0,2313 die vrouwen harte erschricketen .
0,2314 dô sie den engel an erblicketen .

0,2315 unde sînen zorn ersâhen .
0,2316 mit vorhten sie jâhen .
0,2317 sie wolten wandeln und bûezen .
0,2318 unde buten sich der guoten ze vuozen .
0,2319 nû hoeret liebe die sage .
0,2320 an dem andern tage .
0,2321 diu kamer des wâren sunne .
0,2322 diu gie zuo ire brunne .
0,2323 an des hoves ende .
0,2324 und twuoc ire reine hende .
0,2325 dô sie ein wîle dâ gesaz
0,2326 aller triuwen lichtvaz
0,2327 und anders nieman bî ir was .
0,2328 ein engel lûter sam daz glas .
0,2329 mit grôzer gûete bevangen .
0,2330 der kom zuo ir gegangen .
0,2331 unde bat sie wesen âne leide .
0,2332 genâde . vröuwede . unde weide .
0,2333 wolte got mit ir geben .
0,2334 unde daz êwige leben
0,2335 aller werlte daz scholte sie gelouben .
0,2336 er sagete ir von den gotes tougenen .
0,2337 daz ir schiere koeme ein licht .
0,2338 daz lange in der vinster niht .
0,2339 mehte sîn verborgen .
0,2340 sie wære diu alle sorgen .
0,2341 mit der barmunge ôle .
0,2342 linden begünde unde senften wölde .
0,2343 sie wære diu die ellenden .
0,2344 wider heim scholte senden .
0,2345 zuo ire rehtem vaterlande .
0,2346 dannen sie mit der sünden bande .
0,2347 kômen von des tiuvels râte .
0,2348 dô sie allergerneste hæte .
0,2349 der rede gehoeret mêr .
0,2350 der engel der mit ir êr .
0,2351 sprâchete unde bî ir stuont .
0,2352 er verbarc ougen unde munt .
0,2353 sîn antlütze joch den schîn .
0,2354 alsô spilete er mit der küniginne .
0,2355 als man pflit mit den kinden .
0,2356 daz sie sîn niht kunde vinden .
0,2357 des began sie wunderen sêre .
0,2358 unde iedoch des dinges mêre .
0,2359 daz er hête ir vüre geleit .
0,2360 von der künftigen wârheit .
0,2361 diu rede dûhte sie ze tief .
0,2362 ire herze dâr under niene slief .

0,2363 sie gedâhte waz er meinete .
0,2364 unde daz er ez baz bescheinete .
0,2365 des wolte sie in gerne biten .
0,2366 sô er nâch sînen sîten .
0,2367 anderstunt zuo ir kâeme .
0,2368 daz sie sîn ein ende vernæme .
0,2369 hier gât ez an den ernest .
0,2370 nû müget ir allergernest .
0,2371 mit liebe unde willigen ôren .
0,2372 die süezen rede hoeren .
0,2373 unde daz allerbezziste mære .
0,2374 daz decheinem süntære .
0,2375 ie wart gekündet .
0,2376 sît Adâm was verschündet .
0,2377 ein burc heizet Nazarêt .
0,2378 in einer gegenôte sie stêt .
0,2379 diu genant ist Galilea .
0,2380 unser vrouwe diu was dâ .
0,2381 aller tugende gimme .
0,2382 sie hête hûs dâr inne .
0,2383 nû was ouch komen diu zît .
0,2384 daz got des vîandes nît .
0,2385 nicken wolte an uns armen .
0,2386 und sich scholte erbarmen .
0,2387 über alle sîn hantgetât .
0,2388 dô wart erwelt von sînem râte .
0,2389 zuo der vrônen boteschaft .
0,2390 ein engel der die kraft .
0,2391 unde die genâde sîner goteheite .
0,2392 der reinen bræhte . unde vüre breite .
0,2393 Gabriêl ist er genant .
0,2394 von dem hân wir in erkant .
0,2395 der Lêviâthânes drozzen .
0,2396 mit dem kriuze hât beslozzen .
0,2397 dô vuor er vroelîche .
0,2398 ûz dem himelrîche .
0,2399 nider zuo der erde .
0,2400 dâ diu gotes werde .
0,2401 saz in einer kemenâten .
0,2402 mit süezem werke berâten .
0,2403 die kleinen sîden sie span .
0,2404 die sie an deme lôze gewan .
0,2405 dô die anderen den hare .
0,2406 muosen spinnen vüre wâr .
0,2407 alsô michel was der glast .
0,2408 den der engelische gast .
0,2409 von gotes ougen brâhte .
0,2410 daz diu maget sich überdâhte .

0,2411 unde daz werc daz sie dâ worhte .
0,2412 daz lie sie von grôzer vorhte .
0,2413 slîfen ûz den handen .
0,2414 des boten sie niht erkante .
0,2415 der sorgen er ir gebuozte .
0,2416 nû hoeret wie er sie gruozte .
0,2417 “avê . got grüezet dich Marîe .
0,2418 diu von allem meile bist vrîe .
0,2419 aller genâden bis dû vol .
0,2420 wan Krist von dir komen schol .
0,2421 unser hêrre ist mit dir .
0,2422 er minnet dich daz geloube mir .
0,2423 unde hât dich dâr zuo erkoren .
0,2424 daz er von dir werde geboren .
0,2425 bî dir wile er belîben .
0,2426 gesegnetiu ob allen wîben .
0,2427 dir nîget swaz sich kan verstân .
0,2428 dû scholt ze brûtbede gân .
0,2429 in dem himele obene .
0,2430 des wirdes dû ze lobenne .”
0,2431 diu maget begunde denken .
0,2432 diu ougen nider senken .
0,2433 sie nam ez in ire ahte .
0,2434 wie daz werden mehte .
0,2435 unde wie dem gruoßsal wære .
0,2436 trûric stuont diu gewære .
0,2437 der engel trôste sie aber sâr .
0,2438 “dîn sorgen dû verlâz .
0,2439 bezziste aller wîbe .
0,2440 got hât in dînem lîbe .
0,2441 im erwelt ein sal .
0,2442 dû scholt der werlte überal .
0,2443 bringen einen sun .
0,2444 der in genâde mac getuon .
0,2445 er wirdet genant Emanuel .
0,2446 unde der heilant Israhel”
0,2447 diu maget die vorhte verlie .
0,2448 einen guoten muot sie gevie .
0,2449 ir selber kiusche sie an sach .
0,2450 ze dem engel si dô sprach .
0,2451 “jâ ne hân ich niht betrahte .
0,2452 wie daz ergên mehte .
0,2453 daz ich kint gebære .
0,2454 unde iedoeh maget wære .
0,2455 ich bin sô komen an dise stunt .
0,2456 daz mir ist vile unkunt .
0,2457 mannes liebe unde geverte .
0,2458 mit vlîze ich mich des werte .

0,2459 unde ouch iemer gerne tuon .
0,2460 wannen kome mir der sun .
0,2461 des muoz mich nemen wunder .”
0,2462 sâr antwürten begunde er .
0,2463 “dû scholt neheines zwîvels pflegen .
0,2464 wande der himelische segen .
0,2465 und der vile heilige geist .
0,2466 der wirdet des kindes volleist .
0,2467 des oberisten tugent unde maht .
0,2468 gezeiget dir wole die ahte .
0,2469 wie im daz mûgeliche sî .
0,2470 daz er dir alsô wone bî .
0,2471 mit sînes geistes touwe .
0,2472 beschatewet er dich vrouwe .
0,2473 unde gevûrdert dich dâr zuo
0,2474 iz wart geordenet vile vruo .
0,2475 daz ez alsô scholte ergân .
0,2476 êr diu erde begûnde stân .
0,2477 unde der himel swebende würde .
0,2478 sælic ist diu bûrde .
0,2479 unde der wuocher dîner bruste .
0,2480 wan dich sünden nie geluste .”
0,2481 als diu rede was ergangen .
0,2482 diu vrouwe wart bevangen .
0,2483 unde erzunde mit rehtem gelouben .
0,2484 ûf huop sie diu ougen .
0,2485 gein der himelischen reste .
0,2486 ire gedinge was sô veste .
0,2487 sie sprach mit diemûete .
0,2488 “got genâde mir der guote .
0,2489 als ich dich hêrre hoere jehen .
0,2490 alsô mûeze mir geschehen .
0,2491 dû bist ez der bote vrône .
0,2492 nû gebe er dir daz êwige lôn .
0,2493 der dich ze mir sande .
0,2494 unde mîn herze erkante .”
0,2495 dô sprach der engel . “âmên .”
0,2496 von des gelouben sâmen .
0,2497 wart sie zehande swanger .
0,2498 got en sûmete ez niht langer .
0,2499 jâ îlte er ze wâre .
0,2500 durch die armen süntære .
0,2501 die mennischheit an sich nemen .
0,2502 dô mahte im wole gezemen .
0,2503 diu herberge alsô reine .
0,2504 sîn muoter unde meit aleine .
0,2505 der wîte er niht verlie .
0,2506 dô er zuo der enge gie .

0,2507 der den himel vile grôz .
0,2508 unde die werlt ie beslôz
0,2509 der suochte im ein kleine stat .
0,2510 dar hâte er sîn gezelt gesazt .
0,2511 unde wart doch geminnert nie .
0,2512 dâ in diu guote entvie .
0,2513 sîn gewalt stuont ebenrîche .
0,2514 sîn magenkraft êwiclîche .
0,2515 joch wart diu mennischheit .
0,2516 gehôhet von der goteheit .
0,2517 diu goteheit ungeswachete .
0,2518 die mennischheit an erlachete .
0,2519 dô got mennische werden ruochte .
0,2520 durch mennischen . den er suochte .
0,2521 er leite an vleischlîche brünne
0,2522 durch allez mannes künne .
0,2523 daz er nâch kampfes site .
0,2524 mit dem vîande strite .
0,2525 dâ wart der himel geneiget .
0,2526 als uns diu schrift zeiget .
0,2527 zuo der erde . daz ergie .
0,2528 dô in unser vrouwe umbevie .
0,2529 mit meitwesendem lîbe .
0,2530 diu nie wart ze wîbe .
0,2531 sie ist mit der erde gemeinete .
0,2532 zuo der sich alsus vereinte .
0,2533 der himel . joch des himels wirt .
0,2534 sie ist diu âne leit gebiret .
0,2535 der engel vrôuwede . der werlte heil .
0,2536 maget âne ende . muoter âne meil .
0,2537 der wîssagen hêrre .
0,2538 hât bewaret . daz von verre .
0,2539 alle sîne knehte .
0,2540 hêten vore geseit rehte .
0,2541 nû vrôuwet sich Isaias .
0,2542 der ez wîlent kûndente was .
0,2543 sich vrôuwet der kûninc Dâvît .
0,2544 der ouch daz urkûnde gît .
0,2545 daz uns von sînem künne .
0,2546 bekome soliche wünne .
0,2547 Aaron mit sîner gerte .
0,2548 der lobet wole ire geverte .
0,2549 wande er sie vore diutete .
0,2550 dem hêbrêischem liute .
0,2551 Gedeon den schepfære vûre treit .
0,2552 den daz nahttow vermit .
0,2553 wande er ire zeichen vûeret .
0,2554 diu nie wart berûeret .

0,2555 die hêren der alten ê .
0,2556 wâren ir wünschente mêr .
0,2557 denne lebenes oder lîbes .
0,2558 wande sie des êresten wîbes .
0,2559 val scholte undervâhen .
0,2560 die genâde sie vore sâhen .
0,2561 des gerten sie ie der süezen .
0,2562 daz got ruochte grüezen .
0,2563 die werlt mit ire gebürte .
0,2564 unde mit des kindes geinwürte .
0,2565 nû sint gewert vûre wâr .
0,2566 die guoten unde die süntære .
0,2567 die guoten . ire krône .
0,2568 jene der barmunge vrône .
0,2569 wande nieman ist sô sündêrîche .
0,2570 wile er bûezen herziclîche .
0,2571 im sî ouch genâde beschert .
0,2572 daz er dem tiuvel wirdet erwert .
0,2573 des haben wir manic urkûnde .
0,2574 von sîn selbes munde .
0,2575 der durch uns ist geboren .
0,2576 daz im nieman werde verloren .
0,2577 niuwan der dâ missetrûwet .
0,2578 unde den sîn schulde niht geriuwet .
0,2579 daz ist diu vrôuwede gemeine .
0,2580 die uns brâhte diu maget reine .
0,2581 swer von der guoten sprechen wolte .
0,2582 vile sinnes er haben scholte .
0,2583 dâ zuo tugent unde gûete .
0,2584 daz er mit reinem gemüete .
0,2585 ire lop mehte gevâhen .
0,2586 daz ist mir leider unnâhen .
0,2587 durch mîn sündelîche bürde .
0,2588 doch gedinge ich daz got würde .
0,2589 mennische durch die armen .
0,2590 unde der dâ wolte erwarmen .
0,2591 ûf megetlîcher bruste .
0,2592 ein süntærinne diu kuste .
0,2593 diu twuoc . diu trückente im sîn vuoze .
0,2594 unde gesteic zuo sînem gruoze .
0,2595 joch daz sie gewan sîn hulde .
0,2596 sus wart diu schuldige âne schulde .
0,2597 unde diu swarze wole getân .
0,2598 des dinge ouch ich sunder wân .
0,2599 sô verre daz ich ernenne .
0,2600 ze sprechenne eteswenne .
0,2601 über mich von der hêren .
0,2602 diu küniginne ist der êren .

0,2603 doch ervürhte ich ez sô sêre .
0,2604 daz ich die rede ab kêre .
0,2605 unde wende des herzen ougen .
0,2606 joch mîn ahte von den tougen .
0,2607 von dem rîche . von der hêrscheffe .
0,2608 von der sûeze . von der trûtscheffe .
0,2609 der muoter mit dem kinde .
0,2610 welich der hov ist welich gesinde .
0,2611 welich ire werdicheit âne ende .
0,2612 swen sô got dâ zuo sende .
0,2613 der schrîbe daz ob er mege .
0,2614 ez ist harte ûz mînem wege .
0,2615 wande ire lop ist sô ahtic .
0,2616 ire genâde alsô mehtic .
0,2617 daz sie girdicliche an sehent .
0,2618 die engel unde ir jehent .
0,2619 iemer ze keiserinne .
0,2620 nû helfe sie uns durch di minne .
0,2621 di got selbe zuo ir hât .
0,2622 und durch den genædigen rât .
0,2623 den er der werlte habe getân .
0,2624 daz wir die sünde werden ane .
0,2625 jâ ligen wir in der nôt .
0,2626 unde en wizzen wenne uns der tât .
0,2627 begrîfet ungewarnet .
0,2628 diu sêle danne gearnet .
0,2629 swaz der lîp ie gevrumete .
0,2630 sælic der wole kumet .
0,2631 ûf daz teidinc swære .
0,2632 daz er die vogetinne mære .
0,2633 mit dieneste erworben hât .
0,2634 des mac dâ werden rât .
0,2635 “ich muoz dir sagen mêre .”
0,2636 sprach der engel hêre .
0,2637 “ein kreftigez zeichen .
0,2638 daz dîn herze schol weichen .
0,2639 ze bezzerunge kêren .
0,2640 diu gotes tougen lêren .
0,2641 dîn niftel Elisabêt .
0,2642 ire dinc vroelîchen stêt .
0,2643 nâch wunsche unde gereite .
0,2644 dô sie in ire kintheite .
0,2645 nehein wuoher gebar .
0,2646 unze sie verwarte gar .
0,2647 unde in daz alter getrat .
0,2648 nû hât sie an der genâden stat .
0,2649 got selbe gesetzet .
0,2650 unde ire leides ergetzet .

0,2651 wole ist ez ir ergangen .
0,2652 sie ist mit kinde bevangen .
0,2653 diu alte gêt nû berhaft .
0,2654 sô grôz ist diu gotes kraft .
0,2655 die maht dû schouwen desten baz .
0,2656 mûgelich ist ime allez daz .
0,2657 daz er gebiutet unde wile .
0,2658 er tuot unde zeiget wunders vile .
0,2659 nû ist der sehste mânôt .
0,2660 daz sîne zeswe daz gebôt .
0,2661 daz diu trûrige wûrde getroestete .
0,2662 diu betwungen beloestete .
0,2663 diu durre wole gesegnete .
0,2664 sô hât er sîn gebe geregenete
0,2665 wande er von gewalte lîhet .
0,2666 des ouch diu natûre verzîhet .”
0,2667 dô diu himelische maget .
0,2668 als uns Lucas saget .
0,2669 gesmackete unde bekorete .
0,2670 von Gabríêles worte .
0,2671 der oberesten sûeze .
0,2672 sie gedâhte daz sie mit gruoze .
0,2673 ire niftel sehen scholte .
0,2674 unde sich des vrôuwen wolte .
0,2675 daz ir sô wole gelûnge .
0,2676 an der gotes barmunge .
0,2677 daz ouch sie muoter scholte wesen .
0,2678 und kindes genesen .
0,2679 diu alte unde diu spæte .
0,2680 diu sîn verzwîvelt hæte .
0,2681 dô huop sich von heime .
0,2682 diu edel unde diu reine .
0,2683 gein dem berge dâ si saz .
0,2684 unarbeitsam dûhte sie daz .
0,2685 über die steinherten strâze .
0,2686 ire gûete kam ez ze mâze .
0,2687 daz sie die lieben sæhe .
0,2688 unde mit ir gote verjæhe .
0,2689 sîner wundere diu sô rîche .
0,2690 sô grôz sint und sô trôstlîche .
0,2691 als sie ire nifteln dô gesach .
0,2692 grôzer vrôuwede nie geschach .
0,2693 vrouwen Elisabête .
0,2694 denne sie an der stunte hête .
0,2695 sie kusten sich mit triuwen .
0,2696 unde begunden iteniuwen
0,2697 diu seltsænen mære .
0,2698 waz genâden an in wære .

0,2699 beidenthalp ergangen .
0,2700 dô wurden ouch entvangen .
0,2701 mit liebe stæter minne .
0,2702 die geverten der küniginne .
0,2703 Elisabêt diu guote .
0,2704 erkante in ire gemüete
0,2705 daz dâ vüre ire ougen .
0,2706 von den gotes tougenen .
0,2707 diu Kristes muoter mære .
0,2708 unde des himels brût komen wære .
0,2709 daz en seite ir mennischen zunge .
0,2710 wan diu gotes stunge .
0,2711 kunde sie wole gelêren .
0,2712 von den künftigen êren .
0,2713 daz was der heilic geist .
0,2714 rehter dinge volleist
0,2715 der alle genâde kûndet .
0,2716 der hête ouch sie entzündet .
0,2717 sâr wart sie wîsheite vol .
0,2718 unde began reden sô wole .
0,2719 von der muoter joch dem kinde
0,2720 der allez himels gesinde
0,2721 rihtet unde wîset .
0,2722 sie wart von ir geprîset .
0,2723 hôher denne ie wîbes name
0,2724 gestige . als iz ir gezam .
0,2725 sie rief mit lûterer stimme .
0,2726 “ô wê aller vrouwen gimme .
0,2727 wâ hân ich gevordert die êre .
0,2728 des muoz mich wundern sêre .
0,2729 wie ich des wirdic würde .
0,2730 daz dû mit solicher bürde .
0,2731 mir ze hûse komen bist .
0,2732 dû treist den genædigen Krist .
0,2733 meitmuoter unsers hêren .
0,2734 waz mac mir nû gewerren .
0,2735 sît dû mich hâst beschouwet .
0,2736 wan von dir wirdet gevröuwet .
0,2737 allez Adâmes geslehte .
0,2738 nû scholte ich dir ob ich mehte .
0,2739 von rehten schulden dienen .
0,2740 des gunde ich vüre mich nieman .”
0,2741 Elisabêt diu alte .
0,2742 nû hoeret waz sie zalte .
0,2743 wie der gotes âtem .
0,2744 sie hête berâten .
0,2745 der diu broeden herze erkert .
0,2746 diu sîn genâde durchvert .

0,2747 er verdultet vinsten nehein .
0,2748 want swâ er ie erschein .
0,2749 dâ hêten urloup die sünde .
0,2750 unde entwichen an der stunte .
0,2751 in vliuhet alliu âkust .
0,2752 werltliche liebe . süntelîchiu gelust .
0,2753 der sælic den er besitzet .
0,2754 ist sô gelêrte sô gewitzet .
0,2755 ze guoter stæte . ze stæter güete .
0,2756 er gît reinez gemüete .
0,2757 tôdes vorhte gotes minne .
0,2758 rehtes girede . rehte sinne .
0,2759 der geist alsô hêre .
0,2760 hiez die vrouwen mêre .
0,2761 sprechen wider die meit .
0,2762 von der süezen wârheit .
0,2763 sie sprach . ir lieplîchen zuo .
0,2764 “mîn sun spilet al ze vruo .
0,2765 an mînen brusten ze wære .
0,2766 er ist vrô unde vrôuwedenbære .
0,2767 sît wir zesamene komen sîn .
0,2768 unde dû mir den gruoßsal dîn .
0,2769 ruochtes erbieten kûninginne .
0,2770 sît bin ich worden inne .
0,2771 daz sich daz kint rüeret .
0,2772 unde ez diu liebe umbevüeret .
0,2773 gegen dîner werdicheit .
0,2774 des hât in diu gotes wîsheit .
0,2775 bewîset . swie er dîn niene sihet .
0,2776 der herschafte er doch jihet .
0,2777 diu dir ze teile ist getân .
0,2778 als ouch ich des mich entstân .
0,2779 er erkennet wole den heilant .
0,2780 der dich des wirdige vant .
0,2781 daz dû eine scholtes sîn .
0,2782 muoter unde magedîn .
0,2783 daz zeiget er mit dem spile .
0,2784 des im diu natûre niene wile .
0,2785 verhängen mit der stimme .
0,2786 daz tuot er dir ze minne .”
0,2787 daz was sancte Johannes .
0,2788 ungeborener verstuont er sich des .
0,2789 bî sîner muoter herzen .
0,2790 daz von dem tiuren merzen .
0,2791 die süntære unde die nôtigen .
0,2792 dem tiuvel scholten an gesigen .
0,2793 unde daz diu maget komen was .
0,2794 diu des kindes sît genas .

0,2795 den nie sünde betwanc .
0,2796 unde an dem der gotes gedanc .
0,2797 joch sîn güete riuwen wolte
0,2798 unde der ein bluome sîn scholte .
0,2799 dâ aller geiste bezziste .
0,2800 inne hête reste
0,2801 dô der gotes toufære .
0,2802 unde sîn vorebote mære .
0,2803 was ze sînen jâren komen .
0,2804 als wir ez hân vernomen .
0,2805 er zeigete an den heilant .
0,2806 den uns got vater sande .
0,2807 daz er mit sînem trôste .
0,2808 die kristenheit erlôste .
0,2809 unde daz er meil nie gewan .
0,2810 als er in dô toufen began .
0,2811 der himel sich ob im ûf tet .
0,2812 im ze êren dâ ze state .
0,2813 ein tûbe hêre ûf im erschein .
0,2814 der nie gelîch wart decheine .
0,2815 die sach er ob im sweben .
0,2816 unde hôrte got urkûnde geben .
0,2817 sencte Marien kinde .
0,2818 daz er der sî dâ man vinde .
0,2819 genâde diu niemer zergât .
0,2820 unde des rîche âne ende stât .
0,2821 ich en wile an disen stunten .
0,2822 niht ganzlîchen kûnden .
0,2823 sent Johannis êre .
0,2824 unze ich daz liet vûre kêre .
0,2825 in unser vrouwen minne .
0,2826 ir ze lobe . mir ze gewinne .
0,2827 daz ander liet hât ende .
0,2828 an daz dritte ich wende .
0,2829 mîn sinne . unde mîn zunge .
0,2830 allen den ze bezzerunge .
0,2831 die unser vrouwen minnent .
0,2832 unde ire genâden sinnent .
0,2833 nû wizzet daz ich iu bescheide .
0,2834 waz der kûninginne ze leide .
0,2835 gevrumete unde geriet .
0,2836 diu übel jüdischiu diet .
0,2837 sie leit itewîze vile .
0,2838 die wârheit ich dâ von wile .
0,2839 kûnden unde mêren .
0,2840 unde mit den heiligen bewæren .
0,2841 ich sage iu wie sie Krist gebar .
0,2842 die süezen rede sulet ir gar .

0,2843 an disem liede hoeren .
0,2844 die en mac niht zerstoeren .
0,2845 des bittern vîandes nît .
0,2846 nû si uns die volleiste gât .
0,2847 diu herze der einvalten .
0,2848 diu schulen sie wole behalten .
0,2849 wande sie alsô wâr ist .
0,2850 sô daz unser heilant Krist .
0,2851 von der megede wart geboren .
0,2852 unde ire kiuscheheit nie wart verloren .
0,2853 swelich wîp diu driu liet hât .
0,2854 sô sie ze kemenâten gât .
0,2855 in ire zeswen bevangen .
0,2856 sie lîdet unlangen .
0,2857 kumber von dem sêre .
0,2858 wande in unser vrouwen êre .
0,2859 genist sie kindes genædiclîchen .
0,2860 die sorgen müezen entwîchen .
0,2861 unde diu unkraft alsô boese .
0,2862 die Even getelôse .
0,2863 in die werlt gesande .
0,2864 dô si gotes niht erkante .
0,2865 unde mit dem genâdelôsen manne .
0,2866 von gote vallen began .
0,2867 swâ diu bûechel driu sint behalten .
0,2868 diu maget wile des walten .
0,2869 daz dâ nehein kint .
0,2870 werde krump noch blint .
0,2871 unde dâ niemer werde geboren .
0,2872 daz êwiclîche sî verloren .
0,2873 si ne welle ez selbe vristen .
0,2874 an dem allerjungesten .
0,2875 dâ diu sêle den lîp verlât .
0,2876 unde ez an den jâmer gât .
0,2877 diu hêre maget sencte Marîe .
0,2878 geruoche die namen drîe .
0,2879 umbe uns armen biten .
0,2880 daz wir mit reinen siten .
0,2881 di hulde müezen erwerben .
0,2882 unde ire helfe . sô wir ersterben .
0,2883 unde genâde an der urstende .
0,2884 sô al diu werlt hât ende .
0,2885 dâ sich hebet daz teidinc .
0,2886 daz grôze gerihte . unde der rinc .
0,2887 den nieman entvliehen mac .
0,2888 wan der eine der den tac .
0,2889 hier wole vore besorget hât .
0,2890 ô wê waz trôstes im dâ zuo gât .

0,2891 als daz urteile wirdet .
0,2892 unde der vorhtelîche hûswirt .
0,2893 mit zorne beginnet scheiden .
0,2894 die lieben von den leiden .
0,2895 sîniu kint von den knehten .
0,2896 die süntære von den rehten .
0,2897 die übeln von den guoten .
0,2898 dâ ruoche diu guote behüeten .
0,2899 alle die sich nû dâ zuo müezent .
0,2900 daz si sie mit dieneste grüezent .
0,2901 guot ist uns der gedinge .
0,2902 ze dem nôtlichem teidinge .
0,2903 wan dâ gesitzet sie bî sîten .
0,2904 dem künige der sô wîten .
0,2905 rîchesenet unde gebiutet .
0,2906 dem himel . der erde . dem liute .
0,2907 al des wir ie gedâhten .
0,2908 daz wir hinnen brâhten .
0,2909 âne buoze unde âne bîhte .
0,2910 daz gestât dâ niht lîhte .
0,2911 als wir uns gedenken .
0,2912 wir ne mügen dâ niht gewenken .
0,2913 aller herzen tougen .
0,2914 mügen wir niht verlougenen .
0,2915 uns kumet dâ ze gehüge .
0,2916 swaz wir ie zerügge .
0,2917 sünden hier gewurfen .
0,2918 die der vrouwen dâ bedurfen .
0,2919 unde ire helfe gerne dâ sehen .
0,2920 die schulen ouch ir nû jehen .
0,2921 ze küniginne mit dieneste .
0,2922 daz wirdet in dort daz liebeste .
0,2923 ob sie hânt ire minne .
0,2924 wellen aber wir die vôtinne .
0,2925 niht gewissen hier mit stæte .
0,2926 sô wirdet ez uns dort al ze spæte .
0,2927 daz dritte liet hebe ich ane .
0,2928 als die ritter zuo dem vane .
0,2929 vaste müezen sîgen .
0,2930 in allen volcwîgen .
0,2931 alsô schulen wir zuo dem sterne .
0,2932 vluht haben gerne .
0,2933 der daz kristenlîche here .
0,2934 bringet über der sorgen mere .
0,2935 ûz des tiuvels bande .
0,2936 zuo dem vröuwederîchem lande .
0,2937 dâ got selbe ist der sunne .
0,2938 ist der tac . ist diu wünne .

0,2939 die nehein trüebe krenket .
0,2940 unde niemer gewenket .
0,2941 nû gehüget wole liebiu kint .
0,2942 die sencte Marien volgente sint .
0,2943 unde sie von herzen meinent .
0,2944 sô sie ire sünde weinent .
0,2945 gedenket wole wie ich hân gesaget .
0,2946 daz diu êwige maget .
0,2947 Josephe wart gemehelet .
0,2948 des sie hengen muoste durch nôt .
0,2949 unde wie er mit ir was dâ heime .
0,2950 unz er bî des meres reine .
0,2951 ze Kapharnaum kêrte .
0,2952 dâ er sîn jungere lêrte .
0,2953 von meisterlîchen sachen .
0,2954 wie sie scholten machen .
0,2955 die nôtvesten kiele .
0,2956 der kraft niene lîhte zerviele .
0,2957 ûf den hôhen ünden .
0,2958 sô die winde unsiten begunden .
0,2959 der alte brûtdegen .
0,2960 der was gewesen underwegen .
0,2961 drîe mânôde und ein halbez jâr .
0,2962 unz er gevrumete vile gar .
0,2963 des in die hêrren bâten .
0,2964 die in geladet hâten .
0,2965 dâr nâch wart er des enein .
0,2966 daz er vüere wider heim .
0,2967 in die burc ze Nazarêt .
0,2968 diu mit grôzem lobe stêt .
0,2969 in sencte Marien güete .
0,2970 dar truoc in sîn gemüete .
0,2971 sîn hîwische unde diu magedîn .
0,2972 hiezen in willekomen sîn .
0,2973 mit vroelîchem anevange .
0,2974 dô stuont ez unlange .
0,2975 unz er des wart inne .
0,2976 an der hêren küniginne .
0,2977 daz sie lebentigez kint truoc .
0,2978 dô gewan er leides genuoc .
0,2979 harte wunderte in dâr an .
0,2980 wie sie iemer dechein man .
0,2981 scholte hân überkomen .
0,2982 diu bî der spîse was gezogen .
0,2983 diu ir in engelischer hande .
0,2984 von himel wart gesant .
0,2985 der vile einvalte man .
0,2986 der hête vorhten unde wân .

0,2987 daz sie mit boeser sache .
0,2988 ze solichem ungemache .
0,2989 wære verrâten .
0,2990 die vrouwen in alle bâten .
0,2991 daz er sich wole gehabete .
0,2992 unde mæzlichen klagete .
0,2993 sie sageten ire unschulde .
0,2994 unde swuoren bî gotes hulde .
0,2995 diu geistlichen wîp .
0,2996 buten sêle unde lîp .
0,2997 daz nieman bekoeme .
0,2998 zuo der megede schoene .
0,2999 mit neheinem ungeverte .
0,3000 noch sie des nie gegerte .
0,3001 daz sie über strâze gienge .
0,3002 unde ieman dâ entvienge .
0,3003 sie ne mohten an ir niht wandels wizzen .
0,3004 wan sie hæte sich gevlizzen .
0,3005 wole sô tugentlicher güete .
0,3006 daz sie ire êren gerne huotte .
0,3007 unde sich selbe ze aller stunte .
0,3008 wole bewaren kunde .
0,3009 der grîse mit dem barte .
0,3010 begunde siuften harte .
0,3011 sîn sêr unde sîn ungemach .
0,3012 ze den vrouwen er dô sprach .
0,3013 “durch got wes wellt ir jehen .
0,3014 jâ meget ir selbe sehen .
0,3015 daz sie kindes swanger ist .
0,3016 waz schol der üppige list .
0,3017 daz ir mich sô umbevüeret .
0,3018 ich lie sie unberüeret .
0,3019 unde hân sie grôze vunden .
0,3020 des bin ich mit leide gebunden .
0,3021 ô wê mir dirre wârheit .
0,3022 hier schulet ir mîn herzeleit .
0,3023 alle schouwen unde kieser .
0,3024 mehte ich nû verliesen .
0,3025 mînen lîp mit rehten zügen .
0,3026 êr mich diu liute belügen .
0,3027 des dûhte mich zît vüre wâr .
0,3028 ô wê . wan ich tât wære .
0,3029 daz ich daz unsælige leben
0,3030 mit êren hête begeben .
0,3031 êr mich begriffe diser schal .
0,3032 der nû schiere vert überal .
0,3033 von mîner juncvrouwen .
0,3034 als man beginnet schouwen .

0,3035 daz kint joch die wiegen .
0,3036 müelîche ist diu werlt ze triegenne .
0,3037 angestlich daz gerihte .
0,3038 dâ ze aller liute gesihte .
0,3039 daz unreht wirdet ervarn .
0,3040 wie mac ich daz iemer bewarn .
0,3041 wir en müezen dâ mit schanden .
0,3042 ersterben von ire handen .
0,3043 die uns geværic sint beiden .
0,3044 ez en ruoche got scheiden .
0,3045 anders denne ich wæne .
0,3046 der mich eine die sorgen âne .
0,3047 mit gewalte wole getæte .
0,3048 ob er mîn genâde hæte .”
0,3049 die vrouwen sprâchen im aber zuo .
0,3050 “wir sagen dir . waz dû tuo .
0,3051 habe hêrre vile guote reste .
0,3052 daz ist dir nû daz bezziste .
0,3053 unze daz got dîn angest wende .
0,3054 unde dir sînen trôst sende .
0,3055 wande gienge ez uns an daz leben .
0,3056 sô en mehten wir dir geben .
0,3057 nehein ende mêre .
0,3058 wan daz der engel hêre .
0,3059 der vrouwen ofte erschein .
0,3060 unde wurden ensament enein .
0,3061 wir en wizzen welicher tougene .
0,3062 der rede ist unlogen .
0,3063 âne in sô wart nie dechein man .
0,3064 der sie ie bræhte dâr an .
0,3065 daz sie iender von uns quæme .
0,3066 unde iemannes wort vernæme .
0,3067 der engel sprach sie dicke .
0,3068 ze sînem liehtem aneblicke .
0,3069 vrôuwte sich ie diu guote .
0,3070 mit reinestætem muote .
0,3071 niht anders hân wir gesehen .
0,3072 swaz wonders hier ist geschehen .
0,3073 daz kumet von des engels râte .
0,3074 der sie ie besorget hât .”
0,3075 Josepch der zûrnete sêre .
0,3076 er sprach “ich en wile niht mêre .
0,3077 vernemen iuwer kôse .
0,3078 ez was ein man boese .
0,3079 niht des engels rât .
0,3080 der iuch betrogen hât .
0,3081 er kom geslichen ûz der stete .
0,3082 von sîner tumplicher bete .

0,3083 hât sie ire muot verkêret
0,3084 des sîn wir gehoenet unde gesêret”
0,3085 Josepch im gedâhte .
0,3086 des in got wider brâhte .
0,3087 daz er wolte entrinnen .
0,3088 êr sîn diu liute inne .
0,3089 wurden allîchen .
0,3090 er sprach er muose entwîchen .
0,3091 durch des lîbes angest .
0,3092 unz er mehte langest .
0,3093 die marter ûf schieben .
0,3094 die gotwerden unde die lieben .
0,3095 mit al sîner habe wolte er lân .
0,3096 daz dûhte in baz getân .
0,3097 denne ob er des erbite .
0,3098 daz er kumber mit ir lite .
0,3099 wande ez unwentic muoste sîn .
0,3100 dô beit er unze der mânschîn .
0,3101 des nahtes ûf gên begunde .
0,3102 dâ bî er den wec vûnte .
0,3103 sô er sich erhûebe .
0,3104 sîn ougen wâren im trûebe .
0,3105 von leides unde des alters swære .
0,3106 wande über die gegenôte mære .
0,3107 was sîn gealter nehein .
0,3108 als er des alles wart enein .
0,3109 mit im selben . unde genôte .
0,3110 sîn sache geordenete .
0,3111 an sînem bette er gelac .
0,3112 der alliu herzen wole mac .
0,3113 von sorgen beloesen .
0,3114 der ne wolte den vröuwedelôsen .
0,3115 unde den reinen brûtdegen .
0,3116 niht lâzen underwegen .
0,3117 sînen engel er im sande .
0,3118 der in des guotlîche ermanete .
0,3119 waz er tuon scholte .
0,3120 unde wes got beginnen wolte .
0,3121 der engel im dô zuo sprach .
0,3122 “hin geleit ist dîn ungemach .
0,3123 Josepch kint Dâvît .
0,3124 dîn schepfære dir den trôst gît .
0,3125 war woltes dû gâhen .
0,3126 dû scholt wider envâhen .
0,3127 dîn gemaheln reine .
0,3128 langer dû niene weine .
0,3129 sie ist ob allen wîben .
0,3130 unde muoz iemer belîben .

0,3131 muoter unde meit hêre .
0,3132 got lîhet ir die êre .
0,3133 daz scholt dû wole gelouben .
0,3134 daz allez ire tougene .
0,3135 von dem heiligen geiste kumet
0,3136 der ie reht unde genâde vrumet
0,3137 an den tougenlîchen rât .
0,3138 sîn güete dich erwelt hât .
0,3139 nû diene ir mit stætem muote .
0,3140 unde habe si in lieber huote .
0,3141 wan der sun den sie bringet .
0,3142 den tiuvel er betwinget .
0,3143 Jêsus wirdet er genant .
0,3144 daz quiut ein heilant .
0,3145 wande er die werlt heilet .
0,3146 diu mit sünden ist gemeilet
0,3147 von der helle vüeret er die .
0,3148 di sînen willen tâten hier .
0,3149 der himel ist im undertân .
0,3150 ze sînem gebote muoz er stân .
0,3151 unde allez daz dâr ie wart .
0,3152 daz ist gesegenet und bewart .
0,3153 von sîner magenkrefte .
0,3154 unde mit der hêrscheffe .
0,3155 die nieman kan verenden .
0,3156 dar scholt dû dîn dienest wenden .”
0,3157 Josepch der vile einvalte .
0,3158 niht langer er entwalte .
0,3159 sîn vröuwede wart erhaben .
0,3160 sîn herze sâr entladen .
0,3161 von sorgen die er hæte .
0,4214 ez ist schoene unde licht .
0,4215 ander gesmîde en mac niht .
0,4216 dâr zuo sich genôzen .
0,4217 daz bediutet den küninc grôzen .
0,4218 der im die krippe hête erkoren .
0,4219 unde hier in erde was geboren .
0,4220 der bî den guoten herzen .
0,4221 verdolet neheinen smerzen .
0,4222 der von rehte daz wole weiz .
0,4223 wie er den wîten umbekreiz .
0,4224 mit gotelîcher güete .
0,4225 beidiu rihte unde behuote .
0,4226 gein dem kinde vrône .
0,4227 in der stat ze Rôme .
0,4228 daz ander wunder geschach .
0,4229 daz ein michel olebach .
0,4230 ûz einem kiseling vîlôz .

0,4231 diu geschiht dûhte vile grôz .
0,4232 der stein was niht sô herte .
0,4233 daz er sich des erwerte .
0,4234 er ne brâhte daz ôle mære .
0,4235 vûre al die burgære .
0,4236 bî dem geistlichem ôle .
0,4237 mûgen wir kiesen wole .
0,4238 die gotes barmnuge .
0,4239 die decheine zunge .
0,4240 en mehte vûre bringen .
0,4241 jâ schulen wir des gedingen .
0,4242 daz wir allenthalben .
0,4243 mit der süezen salben .
0,4244 die wunden sô bestrîchen .
0,4245 daz diu vûle müeze entwîchen .
0,4246 ein lügenlicher got .
0,4247 der die sturme gebôt .
0,4248 beidiu volcwîc unde strîte .
0,4249 der stuonte an der zîte
0,4250 ze Rôme hôhe gesazt .
0,4251 in êrte alliu diu stat .
0,4252 er was Mars genant .
0,4253 unde vile wîten erkant .
0,4254 er hête die werlt betrogen .
0,4255 unde zuo im gezogen .
0,4256 daz sie durch in alle tâten .
0,4257 unde in ze gote hâten .
0,4258 der hête daz vore gesaget .
0,4259 swenne sô ein maget .
0,4260 ein degenkint gebære .
0,4261 daz âne vater wære .
0,4262 sô muose er vallen ze wære .
0,4263 sie wânt in der bürge .
0,4264 daz daz iemer würde .
0,4265 daz maget kint trüege .
0,4266 âne mannes vuoge .
0,4267 doch hiezen sie durch gewarheit .
0,4268 di valschlichen goteheit .
0,4269 mit vlîze starke vestenen .
0,4270 und allez daz sie westen .
0,4271 dâ sie mit scholte gestân .
0,4272 daz leiten sie dâr an .
0,4273 dô Krist wart geboren .
0,4274 dô was ire antwerc verloren .
0,4275 diu sûl sich dô zarte .
0,4276 daz nieman des gewarte .
0,4277 unze sie in allen gâhen .
0,4278 ire meister vallen sâhen .

0,4279 michel wart daz krachen .
0,4280 diu liute muosen wachen .
0,4281 von dem slage sie erkômen .
0,4282 erschütete wart dô Rôme .
0,4283 von der alten trügeheit .
0,4284 got wolte mit der wârheit .
0,4285 den stuol selbe reinen .
0,4286 unde zeigete daz man in einen .
0,4287 ze gote erkennen scholte .
0,4288 als der tiuvel dô verdolete .
0,4289 den slac von himel sô grôzen .
0,4290 er vuor ze sînen genôzen .
0,4291 sâr verstôzen in die helle .
0,4292 mit vile wêlichem geschelle .
0,4293 dâ ist er gebunden sêre .
0,4294 daz er niemer mêre .
0,4295 her ûz mac gereichen .
0,4296 daz ist daz dritte zeichen .
0,4297 daz vierde wunder daz was .
0,4298 diu michel ! .
0,4299 aller vride meiste .
0,4300 mit des keisers volleiste .
0,4301 der wart erhaben unde gesworen .
0,4302 dô Krist was geboren .
0,4303 an dem tage vile hêren .
0,4304 dâ wolte er uns mit lêren .
0,4305 daz er der wâre vride sî .
0,4306 dâ wir genâde vinden bî .
0,4307 unde der uns sicher mache .
0,4308 von allem ungemache .
0,4309 unde von des tiuvels gewalte .
0,4310 des hôchvart er valte .
0,4311 mit sîner geinwürte .
0,4312 unde der meide gebürte .
0,4313 uns kom vride guoter .
0,4314 dô diu reine muoter .
0,4315 den sun umbevie .
0,4316 der den übeln tôt niht en lie .
0,4317 sô vaste rîchesenen als êr .
0,4318 dannoch brâhte er uns sælden mêr .
0,4319 daz ist daz êwige leben .
0,4320 daz er den sînen wile geben .
0,4321 Augustus aber gedâhte .
0,4322 an der hêren Kristes nahte .
0,4323 waz sîner krône tohte .
0,4324 unde mit welichen dingen er mohte .
0,4325 sînen gewalt erzeigen . mit güete .
0,4326 unde sîn tugentrîche gemüete .

0,4327 in sînem gezelte er lac .
0,4328 keiserlîche als er pflac .
0,4329 dô vrôuwte er sich der rîche .
0,4330 diu im dienten vorhtlîche .
0,4331 unde der manigen lande .
0,4332 diu dâ in sîner hande .
0,4333 stuonten âne widerstrît .
0,4334 wande nie vore des noch dâ nâch sît .
0,4335 wart dechein keiser sô mære .
0,4336 dem alliu diu werlt wære .
0,4337 ensament undertân .
0,4338 wie diu scholte gestân .
0,4339 daz muose er besorgen .
0,4340 an dem selben morgene .
0,4341 dô was er worden enein .
0,4342 dâ wole sîn tugent an schein .
0,4343 daz alle die dâr wæren .
0,4344 wîten in den karkæren .
0,4345 gevangen unde gebunden .
0,4346 die gedingen niene kunden .
0,4347 daz man die lieze vrî .
0,4348 Krist wolte dâ bî .
0,4349 sich selben lân erkennen .
0,4350 unde sîn goteheit nennen .
0,4351 der megede sun süeze .
0,4352 mit genædiclichem gruoze .
0,4353 kom er sînen kinden .
0,4354 er hiez sie abe binden .
0,4355 die ketene alsô swære .
0,4356 dâ ze dem hellekarkære .
0,4357 die sîner helfe ie bâten .
0,4358 unde sîn gebiten hâten .
0,4359 er lôste sie mit sîner künfte .
0,4360 daz zeichen was daz vünfte .
0,4361 daz sehste schulet ir hoeren .
0,4362 mit willigen ôren .
0,4363 daz zeiget ouch hin ze gote .
0,4364 Augustus aber gebôt .
0,4365 über alliu sîniu rîche .
0,4366 die ire hêrren vrevellîche .
0,4367 wâren entrunnen .
0,4368 daz die alle wider sunnen .
0,4369 unde daz sie wurben suone .
0,4370 ze ire rehtem hêrtuome .
0,4371 die daz gebot zerbrâchen .
0,4372 unde die volge versprâchen .
0,4373 die muosen lîden grôze nôt .
0,4374 in wart erteilet der tôt .

0,4375 drîzic tûsent unde mêre .
0,4376 die hiez der vürste hêre .
0,4377 durch die vrevêl houbeten .
0,4378 die daz niht geloubeten .
0,4379 daz ime ernest wære .
0,4380 die vreisten leidiu mære .
0,4381 daz bezeichnenet die verworhten .
0,4382 die dâ wellent âne vorhten .
0,4383 dise werlt bûwen .
0,4384 die schalke ungetriuwen .
0,4385 hânt sich gerihtet ze vehtenne .
0,4386 wider unseren trehtîn .
0,4387 der uns hât geheilet .
0,4388 sô wirdet ouch in verteilet .
0,4389 sêle unde lîp ensament .
0,4390 wan swer sich hier schamet .
0,4391 ze hoerenne daz gotes wort .
0,4392 ez geriuwet in dort .
0,4393 sô er sîn buoze muoz bestân .
0,4394 des geruoche er uns erlân .
0,4395 der unser broedicheit .
0,4396 mit sîner goteheit .
0,4397 bedecket hât sô schône .
0,4398 unde gît sich selben uns ze lône .
0,4399 daz sibent was ein sterne .
0,4400 der dûtte den mandelkerne .
0,4401 von Aaronis gerte .
0,4402 dô die nûzze wuohsen herte .
0,4403 ûf dem dîrrem zwîe .
0,4404 diu maget sencte Marîe .
0,4405 wart bezeichnenet dâ mite .
0,4406 diu mit kiuschlîchem site .
0,4407 unde ouch âne mannes râten .
0,4408 die mandeln uns brâht hâte .
0,4409 ire niuwe geborenez kint .
0,4410 ist sô mehtic daz ime sint .
0,4411 alliu rîche undertân .
0,4412 er hiez den sterne wole getân .
0,4413 von den wolkenen ûf stîgen .
0,4414 mohten ez niht verswîgen .
0,4415 die gelêrten unde die alten .
0,4416 die sinnes kunden walten .
0,4417 die sprâchen ze ire triuwen .
0,4418 iz bediutet den küninc niuwen .
0,4419 den diu maget scholte tragen .
0,4420 sie hêten ez von den wîssagen .
0,4421 vile dicke vernomen .
0,4422 er muose mit liehte komen .

0,4423 wande er ouch von niehte .
0,4424 in dem êwigen liehte .
0,4425 hête geschaffen alliu dinc .
0,4426 den himel unde den umberinc .
0,4427 der sterne huop sînen schîn .
0,4428 an dem âbende dô diu kûninginne .
0,4429 daz wâre licht gebar .
0,4430 vile rehte kêrete er dar .
0,4431 dâ er was in dem steine .
0,4432 unde sîn muoter reine .
0,4433 und gap in sîn urkûnde .
0,4434 sô lange unze an die stunte .
0,4435 daz er die kûninge ûz erweite .
0,4436 und sie ze der sælde beleitte .
0,4437 dô der ahtode tac .
0,4438 nâch sîner gebûrte gelac .
0,4439 besnîden er sich dô lie .
0,4440 swie an im wurde vunden nie .
0,4441 decheiner slahte meil .
0,4442 daz geschach durch unser heil .
0,4443 wîzer was er denne der snêw .
0,4444 iedoch en liez er im die ê .
0,4445 ûf der erde niht versmâhen .
0,4446 die wir schulen entwâhen .
0,4447 geheizen wart er Jêsus .
0,4448 der engel nante in alsus .
0,4449 nû twingen wir unde zamen .
0,4450 unser broede in sînem namen .
0,4451 mit vile reinlîchen siten .
0,4452 wir ne werden besniten .
0,4453 alsô von sîner lêre .
0,4454 wir müezen uns sêre .
0,4455 ânen gotes hulde .
0,4456 unde belîbent unser schulde .
0,4457 tôtliche überladen .
0,4458 der armen sêle ze schaden .
0,4459 wande ez ir allez bekumet .
0,4460 swaz der lîp hier gevrumet .
0,4461 sô diu schidunge ergât .
0,4462 sælic der dâ iht rehtes hât .
0,4463 Chaldaea ist ein lant .
0,4464 an der schrift alsô genant .
0,4465 dâ stuonten nâch der sage .
0,4466 drîe kûninge an Kristes tage .
0,4467 ûf einem teidinge .
0,4468 die wâren kûnnelinge .
0,4469 sie wolten unterscheiden .
0,4470 ire rîche unde ire eigen .

0,4471 want sie zerwurfen ungerne .
0,4472 dô kom der lichte sterne .
0,4473 mit grôzem schime . mit niuwer krefte
0,4474 gâhes zuo der hêrschefte .
0,4475 die hêrren sich berieten .
0,4476 waz der sterne scholte gebieten .
0,4477 unde waz er dinges meinte .
0,4478 ire wîsheit sich vereinte .
0,4479 daz in der schepfære .
0,4480 dâ mit gekündet wære .
0,4481 zesamene sie dô swuoren .
0,4482 zehant daz sie vuoren .
0,4483 swar sie daz zeichen leitte .
0,4484 ire râvît wâren gereite .
0,4485 dâ swungen sich ûf die helde .
0,4486 und kêrten gein der selde .
0,4487 des kindes unde der muoter .
0,4488 got vater guoter .
0,4489 der wîste in daz lieht allez vore .
0,4490 in den luften enbore .
0,4491 durch die werlt breite .
0,4492 als er in den wec seite .
0,4493 unz er sie brâhte in daz lant .
0,4494 dâ geboren was der heilant .
0,4495 diu liebe hiez sie gâhen .
0,4496 wan sie sich versâhen .
0,4497 gotes in mennischen ahte .
0,4498 der in wole genâden mahte .
0,4499 dô dise küninge drîe .
0,4500 muotes wîse . der sünden vrîe .
0,4501 ze Jerusalêm kâmen .
0,4502 ein vrist sie dâ nâmen .
0,4503 mit gemeinlichem râte .
0,4504 daz ez der küninc iht hâte .
0,4505 ze leide oder ze unminne .
0,4506 als er des würde inne .
0,4507 daz sie in dem lande wâren .
0,4508 unde in iedoch verbæren .
0,4509 dô giengen die recken ziere .
0,4510 vüre den übeln wirt schiere .
0,4511 Herôdes was er genant .
0,4512 unde rîchesenete über daz lant .
0,4513 er entvie sie wole vüre wâr .
0,4514 dô huoben sie ûf diu mære .
0,4515 von dem niuwen kinde .
0,4516 unde dem sterne der in lûhte .
0,4517 der küninc entvienc ez swinde .
0,4518 diu rede in vremede dûhte .

0,4519 al der hov erkom joch diu stat .
0,4520 der hêre sie aber bat .
0,4521 daz sie im vûrebaz seiten .
0,4522 unde der wârheit bereitten .
0,4523 umbe daz kint sô hêre .
0,4524 des name . gewalt . unde êre .
0,4525 sô kreftic scholte sîn .
0,4526 wie in daz wære worden schîn .
0,4527 die hêren im antwurten .
0,4528 mit zuhtlîchen worten .
0,4529 “wir suochen daz selbe kint .
0,4530 durch daz under ime sint .
0,4531 beidiu engel unde liute .
0,4532 daz zeiget er wole ze diute .
0,4533 ir meget ez hoeren gerne .
0,4534 von himel kom ein sterne .
0,4535 dâ wir wâren alle drî .
0,4536 sô michel schoenheit was im bî .
0,4537 daz sie nieman vûre bringen mac .
0,4538 dô gewunnen wir lieben tac .
0,4539 wande wir an den stunten .
0,4540 von gotes gûete ervunten .
0,4541 waz daz wunder meinte .
0,4542 diu schrift . uns daz bescheinte .
0,4543 wie daz zeichen scholte erschînen .
0,4544 sô Krist heilant den sînen .
0,4545 ze helfe wolte komen .
0,4546 alsô hêten wir ez vernomen .
0,4547 dô wurden wir ze râte .
0,4548 daz wir strîchen drâte .
0,4549 die hêrschaft ze suochenne .
0,4550 unde ob sîn got wile geruochen .
0,4551 sô mügen wir niht erwinden .
0,4552 unze wir die heimuote vinden .
0,4553 die daz kint besezzen hât .
0,4554 dem al diu werlt ze dieneste stât .
0,4555 sîn sterne unser wîsel wart .
0,4556 unde gap uns vroelîche vart .
0,4557 unze her an daz bûrge tor .
0,4558 dâ entweich er uns vore .
0,4559 dô gedingeten wir ze wâre .
0,4560 daz unser heil hier wære .
0,4561 unde ouch hier wurden gewert .
0,4562 des unser herzesêr gert .
0,4563 wir wolten daz kint êren .
0,4564 unde sînen gewalt vile hêren .
0,4565 ze den sînen vuozen .
0,4566 diemüeticlîche grûezen .”

0,4567 Herôdes der verworhte .
0,4568 sînes rîches er dô vorhte .
0,4569 er gewan manigen muot .
0,4570 waz im ze tuon wære guot .
0,4571 er gedâhte daz er mit swerten .
0,4572 sîn rîche müese beherten .
0,4573 dô besande er di wîsen
0,4574 die geerten unde die grîsen .
0,4575 die der buoche pflâgen .
0,4576 er begunde sie vrâgen .
0,4577 wes diu schrift unde die wîssagen jâhen .
0,4578 und wâ sie sich versâhen .
0,4579 daz Kristes geburt scholte ergân .
0,4580 dem alliu rîche undertân .
0,4581 unde dienesthaft muosen sîn .
0,4582 die hêrren tâten im daz schîn .
0,4583 Bêthlêhêm sie benanten .
0,4584 want sie daz erkanten .
0,4585 daz in diu maget gebære .
0,4586 diu von Dâvît komen wære .
0,4587 die drî künige er dô bat .
0,4588 sô sie kômen an die stat .
0,4589 daz sie daz kint vereischten .
0,4590 daz sie dâr an leisten .
0,4591 des er sie gebat .
0,4592 daz sie boten drâte .
0,4593 nâch im hiezen îlen .
0,4594 er wolte ouch ze den wîlen .
0,4595 sich bieten an sînen vuoze .
0,4596 daz im der sorgen würde buoze .
0,4597 unde al sîner missetæte .
0,4598 die er gevrûmet hâte .
0,4599 die süeze der worte er bôt .
0,4600 unde ahtete den bitteren tât .
0,4601 tougenlîche in dem muote .
0,4602 der übel unde der unguote .
0,4603 die künige urloup nâmen .
0,4604 dô sie dô wider kâmen .
0,4605 an ire wec . ûz der stete .
0,4606 nâch ire wunsche unde ire beten .
0,4607 ruochete sie got gewern .
0,4608 sînes geleites an dem sterne .
0,4609 er kom in abe unde vuor in vore .
0,4610 rehte von dem bürge tore .
0,4611 unze an die sæligen stat .
0,4612 dâ sich nider hête gesazt .
0,4613 mit dem kinde diu maget .
0,4614 diu sælde in wole behagete .

0,4615 unde erhuop ire herze sô .
0,4616 daz sie wurden starke vrô .
0,4617 unde lobeten gotes tougene .
0,4618 diu sie sâhen mit ire ougen .
0,4619 sus brâhte sie ire wîsel dar .
0,4620 der liehte unde wolegevar .
0,4621 unde gestuont dâ ze stete .
0,4622 dâ mit er in ze wîse tet .
0,4623 daz sie vûrebaz niene scholten .
0,4624 ob sie got êren wolten .
0,4625 die vûrsten in daz hûs trâten .
0,4626 mit ire opfer daz sie hâten .
0,4627 von rîchem willen bereit .
0,4628 vûre daz kint unde die meit .
0,4629 vielen sie herzielîche .
0,4630 ire muot was verstantlich .
0,4631 want den sie mennischen sâhen .
0,4632 der goteheit sie im jâhen .
0,4633 unde daz sie âne meil wære .
0,4634 diu in muoter gebære .
0,4635 der eine truoc in der hant .
0,4636 die goltmassen wole gebrant .
0,4637 dâ mit bediut er die kraft .
0,4638 unde die keiserlîchen hêrschaft .
0,4639 die der kûninc aller kûninge hât .
0,4640 dem daz golt wole ze mâze stât .
0,4641 der ander brâhte wîrouch .
0,4642 dâr an erzeigete er ouch .
0,4643 daz er got wære unde êwart .
0,4644 der al die werlt bewart .
0,4645 der dritte mirren dar bôt .
0,4646 dâ mit urkündete er den tôt .
0,4647 den er sît an dem kriuze leit .
0,4648 jâ was dô ein gewoneheit .
0,4649 daz man tôten mit mirren behielt .
0,4650 daz ire dechein vûle wielt .
0,4651 daz opfer was bezeichenlich .
0,4652 lobesam unde wûnniclich .
0,4653 jâ hêten sie vûre wâr .
0,4654 des kindes hêrschaft mære .
0,4655 sîn gotelîche güete .
0,4656 unde des tôdes diemüete .
0,4657 an der gebe wole beslozen .
0,4658 des hânt sie von rehte genozzen .
0,4659 die lieben gotes holden .
0,4660 dô sie des nahtes slâfen scholten .
0,4661 ein engel liechter in erschein .
0,4662 unde gebôt in daz sie heim .

0,4663 ein ander strâze muosen varn .
0,4664 er sprach “ir schulet daz bewarn .
0,4665 daz ir den küninc iht mêr sehet .
0,4666 unde ime des verjehet .
0,4667 wâ daz kint mit der mutter sî .
0,4668 want untriuwe wonet im bî .
0,4669 anders hât er gedâht .
0,4670 denne er iuch habe inne brâht .
0,4671 er wile den heilant verliesen .
0,4672 des schulet ir in verkiesen .”
0,4673 dô sie den morgen sâhen .
0,4674 sie begunden gâhen .
0,4675 ze der milten küniginne .
0,4676 diu gruozte sie mit minne .
0,4677 mit urloube sie dannen schieden .
0,4678 unde kusten an di wiegen .
0,4679 dâ ire hêrre inne lac .
0,4680 daz was in der liebeste tac .
0,4681 den sie gelebet hâten .
0,4682 des engels gebot sie tâten .
0,4683 und nâmen in eine krümbe .
0,4684 joch ein ander vart umbe .
0,4685 sus mit ! vlîze sie behuotten .
0,4686 ob Herôdes wolte wüeten .
0,4687 daz er sie doch niht geschenden .
0,4688 noch der reise mehte erwenden .
0,4689 sie vuoren in ire gegene .
0,4690 got in sînem segene .
0,4691 brâhte sie heim gesunde .
0,4692 ze einer unlangen stunte .
0,4693 über die wochen sehse .
0,4694 dô sie des zît wesse .
0,4695 dô brâhte diu maget guote .
0,4696 mit vröuwederîchem muote .
0,4697 hin ze kirechen ire sun .
0,4698 als diu ê gebôt ze tuon .
0,4699 daz reht sie wole behielt .
0,4700 swie sie der kiuschicheit wielte .
0,4701 diu in dem himel oben .
0,4702 iemer ist ze lobenne .
0,4703 sie zunde ire liehte kerzen .
0,4704 diu ie in dem herzen .
0,4705 liechter was denne diu sunne .
0,4706 aller engele wünne .
0,4707 zwô turteltûben sie brâhte .
0,4708 dâ ir got mit gedâhte .
0,4709 wan under den vogeln allen .
0,4710 niht mêr lebet âne gallen .

0,4711 niht sô guotes unde sô reines .
0,4712 âne die bedorfte decheines .
0,4713 andern opferes diu reine .
0,4714 diu muoter ist unde maget eine .
0,4715 dar kom der alte Simeon .
0,4716 dem hête got ze lône .
0,4717 sînes gedinges daz gegeben .
0,4718 daz er sô lange muose leben .
0,4719 unz er den wâren heilant .
0,4720 entvienge in sîne hant .
0,4721 unde in vroelîche gesæhe .
0,4722 des der himel ze hêren jæhe .
0,4723 dô huop er in ûf mit vrôuwede .
0,4724 des herzeliep er beschouwete .
0,4725 unde des genâden er gerte .
0,4726 er sprach . “nû bin ich gewerte .
0,4727 hêre des ich ie bat .
0,4728 dû hâst mich brâht an die stat .
0,4729 daz ich dîn heil gesehen hân .
0,4730 nû scholt dû mich varn lân .
0,4731 hêre in dînem vride .
0,4732 durch des liehtes underdige .
0,4733 daz dû der werlte hâst gesant .
0,4734 hêre daz hân ich erkant .”
0,4735 ein witewe diu hiez Anne .
0,4736 diu was gewesen lange .
0,4737 in dem gotes hûse .
0,4738 des nahtes âne grûse .
0,4739 daz sie ir niene vorhte .
0,4740 anders sie niht en worhte .
0,4741 wan daz sie ire gebetes huotte .
0,4742 diu stæte unde diu vile guote .
0,4743 zeigete ûf den heilant
0,4744 und umbevienc in zehant .
0,4745 sie sprach daz er wære .
0,4746 der werlte schepfære .
0,4747 der mit mennischlîcher wât .
0,4748 sîn hêrschaft bedecket hât .
0,4749 er wær ez der rîche Krist .
0,4750 der rechten trôst . der armen genist .
0,4751 dô hête er urkündes genuoc .
0,4752 diu muoter diu in truoc .
0,4753 vile werde ir dâ geschâch .
0,4754 sîn lop daz was ir gemach .
0,4755 von gote birn wir allentsament .
0,4756 an disen dingen gemanet .
0,4757 sô wir ze kirechen gên .
0,4758 daz wir dâ zühticlîchen stên .

0,4759 unde daz wir von herzen meinen .
0,4760 ob al der werlte in einen .
0,4761 der uns von nihte geschuof .
0,4762 unser gebet unde unsern ruof .
0,4763 schulen wir an in wenden .
0,4764 jâ mac er wole verenden .
0,4765 swaz uns sorgen obe lît .
0,4766 er ist der die genâde gît .
0,4767 diu iemer wert âne wanc .
0,4768 aller wîsheit anevanc .
0,4769 er ist ouch diu wâre minne .
0,4770 diu dâ unser sinne .
0,4771 erzünden sol mit sînem viure .
0,4772 dâ zuo hât er uns ze stiure .
0,4773 sîne muoter gegeben .
0,4774 die uns daz êwige leben .
0,4775 vile wole mac erwerben .
0,4776 die in ire hulden ersterben .
0,4777 dô daz mære kom gevlogen .
0,4778 daz Herôdes was betrogen .
0,4779 von den kûningen drîen .
0,4780 vore leide began er schrîen .
0,4781 als er toben wolte .
0,4782 er sprach daz er sie mit golde .
0,4783 wider wæge alle .
0,4784 in ze schanden unde ze valle .
0,4785 daz sie im niht boten sanden .
0,4786 dô in Krist kom ze handen .
0,4787 als sie hêten gelobet .
0,4788 dô was den hêrren sô gezoget .
0,4789 daz sie wole entwichen wâren .
0,4790 daz er niene mohte ire gevâren .
0,4791 doch hiez er in nâch rîten .
0,4792 unde suochen alsô wîten .
0,4793 dô daz niht vervie .
0,4794 ze râte er mit grimme gie .
0,4795 mit sînen mortgelîchen .
0,4796 die rieten ouch im tobelîchen .
0,4797 daz man diu kint alliu erslüege .
0,4798 sô gâhes mit der vuoge .
0,4799 daz Krist under in verdürbe
0,4800 ê daz er verborgen würde .
0,4801 sô wê dir untriuwe daz dû bist .
0,4802 sie wânten daz der list .
0,4803 dâ ze gote verholen wære .
0,4804 des tiuvels volgære .
0,4805 die wâren dâr an erblendet .
0,4806 gehoenet unde geschendet .

0,4807 der megede sun vile wole genas .
0,4808 daz Herôdis wille was .
0,4809 daz en mohte niht ergên .
0,4810 ein engel kom ze Bêthlêhêm .
0,4811 Josephen er an harte .
0,4812 daz er daz kint bewarte .
0,4813 er hiez in wesen munder .
0,4814 unde seite im ouch dâr under .
0,4815 die künftigen sorgen .
0,4816 diu dannoch was verborgen .
0,4817 in des küniges eiterigem râte .
0,4818 er manete in îlen drâte .
0,4819 daz er vuorte den heilant .
0,4820 verre in Egiptelant .
0,4821 under die heidenische diet .
0,4822 daz gebôt er unde geriet .
0,4823 daz er sich dâ enthabete .
0,4824 unz er im aber sagete .
0,4825 des vröuwte sich diu maget mit dem alten .
0,4826 daz er scholte behalten
0,4827 daz unschuldige Kristes bluot .
0,4828 daz sô genædic unde guot .
0,4829 dô Josepch gewarnet wart .
0,4830 er huop sich sâr an die vart .
0,4831 vile snelle unde unbedrozzen .
0,4832 der di werlt hât beslozzen .
0,4833 und alliu dinc in sîner hant .
0,4834 der wolte ditze irdische lant .
0,4835 mit ungemache bûwen .
0,4836 er vlôch die ungetriuwen .
0,4837 die engele wâren im bî .
0,4838 sîn muoter edele unde vrî .
0,4839 vuor des nahtes dannen .
0,4840 mit ir der vile reine man .
0,4841 der sie beidiu beruochte .
0,4842 die vremeden Krist besuochte .
0,4843 der mâne bôt im sînen schîn .
0,4844 der in der pfalenze sîn .
0,4845 verdolet neheine vinster .
0,4846 die juden lie er ze der vinster .
0,4847 er wolte mit den heidenen . sîn lop gemêren .
0,4848 unde zuo den genædicliche kêren .
0,4849 daz sie sich toufen liezen .
0,4850 und im dienst gehiezen .
0,4851 swaz der tiuvel an getreit .
0,4852 ich weiz er sich niemer geleit .
0,4853 unz er daz volbringet .
0,4854 swâ er ie nâch ringet .

0,4855 daz kan er wole bestæten .
0,4856 mit bitterlîchen ræten .
0,4857 Herôdes der tumble .
0,4858 der hiez dô rennen umbe .
0,4859 al die sînen wüeterîche .
0,4860 er hiez sie grimmiclîche .
0,4861 die jungen degene verliesen .
0,4862 swâ sie daz mehten kiesen .
0,4863 daz sie in den zwein jâren .
0,4864 von muoter komen wæren .
0,4865 ! ! ! ! .
0,4866 er hiez sie allenthalben dâ .
0,4867 sînen willen leisten .
0,4868 êr iz diu liute vereischten .
0,4869 daz der schade wære ergangen .
0,4870 der wolf was mit zorne bevangen .
0,4871 die boten sich ûf swungen .
0,4872 in die stat sie drungen .
0,4873 diu Bêthlêhêm heizet .
0,4874 ire herze was gereizet .
0,4875 mit eiterigem hazze .
0,4876 sie vuoren von gazzen ze gazze .
0,4877 diu swert sie erbarten .
0,4878 den grimmen tôt sie garten .
0,4879 sie zuhten bî den vahsen .
0,4880 diu kint ungewahsen .
0,4881 diu houbet sie abe sluogen .
0,4882 bein unde arme genuogen .
0,4883 unde rigen siu an diu wâfen .
0,4884 diu bî den ammen slâfen .
0,4885 scholten an ire brüsten .
0,4886 ô wê wes machete sie gelüsten .
0,4887 die sôgetânen morttæten .
0,4888 der tiuvel hête sie verrâten .
0,4889 unde dâr zuo geschündet .
0,4890 âne des rât nieman sundet .
0,4891 die gesellen der meintæte .
0,4892 die îlten vile drâte .
0,4893 rehte also umbe wette .
0,4894 von bette ze bette .
0,4895 von viure ze viure .
0,4896 innerhalp der burcmûre .
0,4897 in selben ze schanden .
0,4898 und truogen in den handen .
0,4899 die bluotigen were .
0,4900 sam sie mit einem here .
0,4901 wîclîche hæten gestriten .
0,4902 mit wülvînen siten .

0,4903 tobeten dise diebe
0,4904 ire hêrren ze liebe .
0,4905 durch sîn unhêrez gebot
0,4906 wider die natûre unde got .
0,4907 dô sie diu kint vûre brâhten .
0,4908 an diu sie vâhten .
0,4909 unmanliche mit arge .
0,4910 dô rûmeten sie die zarge .
0,4911 und teilten sich in die gegene .
0,4912 ouch dâ nider legen .
0,4913 vile maniger muoter vrôuwede .
0,4914 in ire aller beschôuwede .
0,4915 wîten wart diu slahte .
0,4916 diu zal ist ûz der ahte .
0,4917 ô wê der steinînen herzen .
0,4918 diu den muoterlichen smerzen .
0,4919 ie mahten vertragen .
0,4920 ô wê welich wuofen . welich klagen .
0,4921 dô diu kint wâren in der nôt .
0,4922 halplebentic unde halptôt .
0,4923 dô si lâgen allen ende .
0,4924 hier die vuoze dort die hende .
0,4925 ô wê dô man sie hin zuhte .
0,4926 unde in daz leben ab drukte .
0,4927 dô der kinde bluot nider gôz .
0,4928 den verkolten in die schôz .
0,4929 swem ie herzeliep geschach .
0,4930 der weiz herzeleides ungemach .
0,4931 waz herzeliep kumbers hât .
0,4932 daz mit herzeleide gestât .
0,4933 dô der mort gevrûmet was .
0,4934 und nehein degenkint genas .
0,4935 in allem dem kreize .
0,4936 dô beweinte ez vile heize .
0,4937 unde vile sêre diu lantschaft .
0,4938 sô swære was des leides kraft .
0,4939 an den wirten unde den vrouwen .
0,4940 muose man jâmer schouwen .
0,4941 die stete lâgen vrôuwedelôse .
0,4942 die muoter sinnelôse .
0,4943 wan sie trôstes niene hâten .
0,4944 iedoch hâte sie nû berâten .
0,4945 diu grôze gotes gûete .
0,4946 die mit ir selbes bluote .
0,4947 unde mit der kinde unschulde .
0,4948 erwurben sîne hulde .
0,4949 unde die êwigen reste .
0,4950 daz ist aller vrôuweden bezziste .

0,4951 got selbe wolte rechen .
0,4952 die übermüete zerbrechen .
0,4953 die Herôdes vuorte
0,4954 ze Kristes geinwurte .
0,4955 gote wolte er an gesigen .
0,4956 dô muose er schantliche geligen .
0,4957 ze einer kurzen vriste .
0,4958 waz hulfen in die liste .
0,4959 der sîn herze vol swebete .
0,4960 dô er mit untriuwen lebete .
0,4961 waz hilfet daz silber oder golt .
0,4962 dâ der boese niht verdolet .
0,4963 rehter tugende învart .
0,4964 der schatz nieman des bewart .
0,4965 er ne müeze ersterben .
0,4966 unde ze valwische werden .
0,4967 Herôdes begunde siechen .
0,4968 daz ûf den betteziechen .
0,4969 swebete bluot unde warc .
0,4970 diu suht diu wart alsô starc .
0,4971 daz er gar vûlen began .
0,4972 nie mennische mêre noete gewan .
0,4973 unde unsælde alsô vile .
0,4974 decheine wünne noch dechein spil
0,4975 mahte er geschouwen ûf der erde .
0,4976 unde smakte vile unwerde .
0,4977 an allen sînen liden .
0,4978 sîn gewalt en mohte daz niht gevriden .
0,4979 er ne muose leitlichen .
0,4980 ligen vore armen unde rîchen .
0,4981 mit den nageln zarte er die hût .
0,4982 er was vile armiclîchen lût .
0,4983 die wîsen arzâte .
0,4984 kunden im niht gerâten .
0,4985 mit wûrzen noch mit salben .
0,4986 er brach sich allenthalben
0,4987 ûzen und innen .
0,4988 dô entwichen im die sinne .
0,4989 michel wart sîn unzuht .
0,4990 dô twanc in ouch diu tobesuht .
0,4991 daz er armer unde unreine .
0,4992 ab einem hôhen steine .
0,4993 sich selben ervalte .
0,4994 dâ nam in der tiuvel ze gewalte .
0,4995 ze Josepch der engel dô sprach .
0,4996 “ende hât dîn ungemach .
0,4997 wider ze lande scholt dû varn .
0,4998 des kindes vîande sint vervarn .

0,4999 unde von der werlte gescheiden .
0,5000 nû hebe dich heim von den heidenen
0,5001 unde wizze daz der heilige Krist .
0,5002 swaz von im geschriben ist .
0,5003 daz wile er in Judêa begân .
0,5004 dâ erhebet sich sunder wân .
0,5005 daz heil der kristenheit .
0,5006 als ez vore ist gewîsheit .
0,5007 unde als er hât geheizen .
0,5008 der boum ist gemeizen .
0,5009 dâ daz heilwæge von bekumet .
0,5010 daz aller werlte gevrumet .”
0,5011 Josepch kêrte dô heim .
0,5012 als im der morgen erschein .
0,5013 mit sînem junchêren .
0,5014 unde der megede vile hêren
0,5015 gewerren en mohte im niht .
0,5016 von decheiner übeln geschiht .
0,5017 noch von vîantlicher lâge .
0,5018 der êr von sînen mâgen .
0,5019 nahtes was entrunnen .
0,5020 der vuor bî liechter sunnen .
0,5021 wider in sîn gesæze .
0,5022 Herôdes der vile ræze .
0,5023 der en entmuotte in niht mêre .
0,5024 er was gevallen sêre .
0,5025 alsô muoz ez allen den ergên .
0,5026 die gote wellent widerstên .
0,5027 und sîner ordenunge .
0,5028 dise warnunge .
0,5029 diu ist iu vore gezelet .
0,5030 ob ir genesen wellet .
0,5031 daz ir die werlt schiuhet .
0,5032 diu hin ze helle ziuhet .
0,5033 und vlihet irdischen hort .
0,5034 durch daz gotes wort .
0,5035 daz âne zwîvel gestât .
0,5036 sô himel und erde zergât .
0,5037 bewart iuch mit stæter huote .
0,5038 vore der übermuote .
0,5039 diu iemer vallen muoz .
0,5040 und nie gewan stætigen vuoz .
0,5041 gedenket wie ez ergie .
0,5042 dem tiuvel dô er gevie .
0,5043 hôchvart unde hôhen muot .
0,5044 dô wart er âne wâfen unde âne bluot .
0,5045 von al den êren gestôzen .
0,5046 mit sînen strîtgenôzen .

0,5047 und muoz êwicliche ersterben .
0,5048 alsô müezen sie verderben .
0,5049 die sich zuo im gepflihtent .
0,5050 unde sich ze hoehe rihtent .
0,5051 ane werltlichen sachen .
0,5052 nû ruoche uns got gemachen .
0,5053 im selben genæme .
0,5054 werde und gezæme .
0,5055 daz wir her nâch geniezen .
0,5056 sent Marîen der süezen .
0,5057 unde der muoter der êren .
0,5058 sô wir hinnen kêren .
0,5059 ire genâde ist sô manicvalte .
0,5060 diu in sînem gewalte .
0,5061 den himel hât besezzen .
0,5062 danne schol sie niht vergezzen .
0,5063 ire diuwe und ire knehte .
0,5064 ouch schulen wir von rehte .
0,5065 iemer êren den ire sun .
0,5066 der uns genâde mac getuon .
0,5067 bezzet vrouwe nie wart .
0,5068 mit grôzen triuwen sie bewart .
0,5069 den sæligen ze aller zît .
0,5070 swer sich innicliche ergât .
0,5071 ûf ire grôze barmunge .
0,5072 dâ ne mohte dechein zunge .
0,5073 ze rehte wole bediuten .
0,5074 wie sie wegete den liuten .
0,5075 an unsers hêren vuozen .
0,5076 swes wir sie begrüezen .
0,5077 daz en lât sie ir niht beslîfen .
0,5078 nû bekoret sie begrîfen .
0,5079 daz sie iu niht entgê .
0,5080 sô müget ir dâ nâch iemer mêr .
0,5081 wesen ungeschendet .
0,5082 want sie unser leit wole verendet .
0,5083 got ist ire hêre unde ire kint .
0,5084 des alle crêatiure sint .
0,5085 des mac sie biten und gebieten .
0,5086 daz wir uns müezen nieten .
0,5087 der êwigen vröuwede .
0,5088 in Kristes beschöuwede .
0,5089 wir schulen ir klagen unser nôt .
0,5090 sie gât daz lebentige brôt .
0,5091 den sêlen ze spîse .
0,5092 unde gebiutet in dem paradîse .
0,5093 unde den himelen gewalticliche .
0,5094 sie ist genædic unde rîche .

0,5095 ze gebenne und ze lîhenne .
0,5096 got mac ir niht verzîhen .
0,5097 der sie im gewîhet hât .
0,5098 über al sîne hantgetât .
0,5099 wir sitzen oder stên
0,5100 in ire hulden schulen wir gên .
0,5101 wir ezzen oder trinken .
0,5102 wir schulen ir . ie gedenken .
0,5103 wir slâfen oder wachen .
0,5104 wir schulen an allen sachen .
0,5105 die guoten und die reinen .
0,5106 pflegen unde meinen .
0,5107 daz sie in dem himelrîche .
0,5108 den engeln uns gelîche .
0,5109 daz wir sie loben dâ .
0,5110 in aeternum er ultra .